

增修肥瘠錄

安亮清題

陸



肥鄉縣志卷四十一

藝文

記

重建成信侯殿記

元新安方虛谷

託孤之難未若立孤之難也幼而長之宗祏危而安之託孤固難死而生之血食絕而續之立孤尤難周成王十三踐祚姬旦攝政四國流言七年而復子明辟此所以幼而長之以安宗祏之危難矣哉夏絜湜之變后緡方娠自竇而逃一成一旅遺臣靡立少康不失舊物此所謂死而生之以續夫血食之絕不示難之尤難者乎是故漢霍光擁祐昭帝保養幼主謂之託孤功爲大不如丙吉張賀有恩于宣帝垂死而生可謂之立孤德爲大今廣平府故洺州肥鄉縣春秋時立趙孤近世封成信侯程姓嬰諱之里也周簡王之三年晉景公時屠岸賈攻殺趙同趙括趙氏盡矣而趙武者趙朔之庶子也侯與公孫杵臼謀而藏之後祁奚韓厥言於景公復立趙武史記晉趙世家春秋內外傳劉道原通鑑外紀所書不同然成季之勳宣孟之忠若一髮懸千鈞迄至于今有社稷不墮皆誰之力歟肥鄉成信侯也則肥鄉之人祀之又豈止一鄉一國之增光歟厥後江南侯有廟甚盛曰祚德封爵又不止此我肥鄉如故南北異也侯之後世

肥鄉縣志

卷四十一 藝文記

居肥鄉程君玉欲新侯廟不果蔣君思爲玉養子繼父志一新之穹殿四楹雕飾完備元貞初元孟秋鳩工基年落成用中統楮幣爲錢百五十萬有奇其里人省郎王君英求記其事夫食人之祿存亡繼絕忠臣也程侯宜書爲人之後肯乃堂穰孝子也蔣君思亦宜得書是爲記

余公河記

明漳浦葉期遠

余公河作於余公也按郡志肥鄉其地平衍而中窪時雨澇則諸水匯而無所洩居民往往病之歲癸丑公蒞肥五月雨六月大雨至秋八月滏陽河溢東出柳林口漫流至辛安鎮又潰而東北至焦家營南至張達等村瀾漲鄉落百里皆爲渠沼田在水中浮苴棲於屋廬民病於昏墊顯顯然無人道生理命至而憐之乃乘桴人諸水鄉民之望救者相率而號于水滸令屬耆老而謀之僉曰惟有鑿河洩水耳令遍歷形勢至王固村得漳河故道其勢迤邐可以容洩諸水度林麓井里有墳墓廬舍者避之可徙者徙之遂決疏鑿之計因白於兩臺郡司俱報可遂計儲峙具餼糧誓於衆老少壯弱執畚鍤而事者五千餘人鋤鏗泉負無敢或緩蓋民苦于患故樂于趨事而不自愛其力也河起自張達村至王固村遂通滏陽河長四十餘里廣凡八步深九尺河之上築土爲堤長與河竟經始於八月之朔底於十月之望潢潦既導渠沼既涸淤淖既平民乃藝麥工暫輟逾年春二月復申令以成厥工民爭赴之按臺馬公令計口授糧令曰未可以發我公帑令贖罪者輸粟得六百石凡十日河乃成是夏又雨桑棗禾稼俱沒予適有事大名

抵河之濟河之北民戚戚咨嗟咸屏足而倚河之南艤舟來渡若有德色既渡居民嬉聚白若予怪而問之舟者進曰在昔未有斯河也吾曹與彼民俱溺自余令鑿斯河從滏陽達天津水不爲患故東南之民瘳也予作而嘆曰尋丈之間而豐滂異抔土之力而憂喜殊安得他令如余令能使彼民如而民耶衆皆稽首而請名予曰河作于余令名曰余公河亦可民悅而信之乙卯秋予以內艱將東歸邑之士紳走幣請記予謂善除民患者勸於民而無所厲於時余令之令茲土順民情而不拂承天時而弗違因地利而不悖勞民力而弗亟用民財而不費苟非仁人君子其孰能與於斯宜乎民之念之也昔召信臣作陂以溉田而民名之曰召公陂蘇子瞻築堤以捍海而民名之曰蘇公堤天下至今稱之然則余公河之惠民固當與召公陂蘇公堤同垂不朽云余公諱燭字德彰別號蒙溪

修城記

梁桐

初孽臣導黃台吉寇京師飛檄報警邦畿地勢坦直無關塞山河之險可據守民相視心如野鹿欲奔散撫臣深憂之已而督守令修城池築墩堡以壯形勢以固人心至慮也所在類以空文還應鮮爲國任事者茲舉也關政機繫民命於乎可如此玩侮哉我縣令潘公屬僚與民而告曰肥去京師僅一千里是故當設備縣上城水溝不具雨積輒圯壞勞築防守角舖四制度頽陋非樓無以張威吾將勦爲之四門樓瓦桶年遠頽折難障風雨無閣板不可登望吾將修補之敷庫儲蓄備調支吾不敢耗歲歛民艱苦

肥鄉縣志

卷四十一 藝文記

二

吾不敢重歛將作窰取築城廢柴陶磚贖罪金足財用茲八月肇事僉曰前既而果得磚若干灰若干板若干木若干作水溝餘四十條角樓四座門樓加修飭各鑿兩側壁開窓使用矢石四越月事竣爲嘉靖壬子冬十一月翼翼乎壯哉縣矣縣屬廣平府亦土城前太守封邱陳公組大聚磚石砌之形勢壯如虎蹲豹變巍然爲名股肱郡足以羽翼京師公力成此役是爲郡增羽翼也守令眞得人哉公號西峯名鐘六安人儒業世家性溫而毅政和而仁大得民和

崇德書院記

明郭崇嗣

勺溪李公之治肥也敦本尙實不炫浮采諸所建立必定經久之制而振宣教化作興士類尤所汲汲焉予聞庠士言往邑長詣學與諸生不交談卒一指而退或有牽於簿書不茶明倫堂即鳴騶去者公朔望外仍約期會數進諸生命坐聽講剖析義理商確性命議論雲湧多發學者所未聞諸生皆人人自喜以爲得師已又念士之爲學非示之的罔定其志非萃之所罔專其業乃謀建書院收邑俊而作養之地未卜也未幾得宋相李文靖祠者在城西門內其地面離背乾幽僻高爽周圍多隙地公闢之喜曰此眞造士之所乎夫古書院若白鹿雒陽岳麓石鼓稱最鉅矣而皆祀先賢爲主俾學者有所瞻法文靖爲宋賢相其言行炳炳可師諸生固不必遠有所慕矣乃即其祠建號舍五十五區在祠之後者十五在祠之兩翼者各二十取大學綱領條目以標其楣祠前故有兩齋各增以廈扁曰日新時敏祠南故有小亭改建

講堂三間扁曰克念號舍之四隅各室三間爲厨舍翼號之南尾各室一間爲學倉貯穀以贍士設門子
二名守之且供諸士掃除之役合而名之曰崇德書院是役也朝夕督工者邑簿郭君朝陽而醫官裴宗
度佐之木植取諸鄉民瓦甍取諸陶戶物料取諸市行皆平價給之凡費金若干則取諸帑餘贖金未常
一毫歛民民不知勞云工肇於庚午之九月至十月終而工訖李公乃出其素養所得著爲困學纂言頒
之諸生以示規範而命予記其歲月於右予既受命乃往觀焉第見講堂巍啟列號 門垣厨庖罔弗
嚴飭一瞻盼頃肅肅乎若鉅公鴻儒正襟危坐於中堂而道德文章爲諸生之標也彬彬乎若羣英列秀
考德問業于左右而鵬鸞鳳翥需國家之用也乃喟然嘆曰偉哉我公作士之功其垂諸不朽者乎夫明
興二百餘年邑令蒞此土者何限豈無三四賢者稱懷士論哉然不越考校勤禮貌優賞予渥耳人往
而事卽湮歲徂而澤亦熄其視書院之興士有永依世荷甄陶之惠者何如哉噫諸士宜慶忭矣雖然作
興者上之事奮勵者士之功卽今厥功告完諸士來遊於此者如能繹崇德之義加克念之功取纂言而
諷誦之日而新時而敏惟德行是先不徒工文詞以爲利祿媒他日出爲世用能樹炳烺之業是於聖學
爲克修於文靖爲無忝庶幾不負李公建院之初心矣假令視爲嬉遊之所晨而入暮而出羣聚鼓頰以
談人之是非德業無聞而徒糜庾粟焉則自棄其矣其何顏藏息於此哉是則諸生之所宜自懼自省者
故併及之李公名棡江右豐城人舉嘉靖乙丑進士大司馬克齋翁子也器宇軒豁學問淵源政事尤極

肥鄉縣志

卷四十一 藝文記

三

精敏蒞肥甫基化布澤流人心大悅書院特其造士一端其他如行鄉約聯保甲興社會公審編愛民節
財興利除害彰善癉惡之類不可縷數予別爲善政記刻之備循良者之採茲不多贅云

李公善政記

郭崇嗣

公名棡字孟敬號勺溪江西豐城人舉嘉靖乙丑進士家世自唐宋以來代有顯宦入我明科目尤盛其
先公少保克齋翁負豪俊之才畿亂穢倭爲時柱石弟兵部見羅公與余同舉壬戌進士溫雅純粹尤稱
蘊藉說者謂公資旣神奇又家學淵源有自故發之文章政事蹕絕如此豈哉公蒞任之始卽以廉儉節
愛誓于神明每月朔望如之市中官價盡行革去里甲舖行無纖毫之擾日用蔬菜卽時給價米帛皆詣
府市交易與本邑分毫無涉下車之初商肆大悅往民詞多滯而費公受詞不厭瑣細原告自拘到卽剖
決小者量責逐出片紙不罰取供者卽面定罪名吏書一毫不預故訟者不費一錢各得輸情歡然帖服
至于紙贖登報無遺邑故嘗行鄉約率應故事公通邑立爲六十餘會挨門編爲保甲刊定規約僉舉鄉
宦士民耆德者爲會正每月各揚善惡赴邑聽行賞罰由是好豪歛迹賊盜潛消風俗爲之頓變公爲政
以教化爲先尤好作興士類每月三日詣學會諸生發明道德性命之蘊皆根極理要醒人心目又卽文
靖祠增修書院建號舍六十餘間立學會以贍貧士刊纂言以示學規邑士莫不感頌邑民素鮮蓄積歲
數災賑穀且盡公勸民無問貧富隨心出穀積爲社會以備荒歛且首捐祇候馬夫銀兩以爲衆倡於是

民皆樂從四鄉儲穀凡數千石邑歲俵大馬往年一馬價且三四十兩縣司相沿舊習仍扣留馬價以充公用而吏書獸醫馬販沾染及在京打點之費馬頭賠累不可勝言公親自閱買價止二十餘兩而諸費悉革其餘銀具狀領出湊買次年大馬公私大省凡節財八九百兩百姓無不感讚大戶收糧及里長賠納多括火耗墜頭甚有收至加二者公令戶頭收齊自納並無火耗等費且人給由稟直書每畝該銀若干里書不能欺騙民甚便之往歲編審均徭率憑書手造報奸弊多端公親加磨越榜令許首毫弊難容花分而歸併者一千八百九十餘戶飛詭而改正者七百九十餘戶出佃而收回者五百三十餘戶欺隱而首出者十頃五十餘畝宿弊爲之一清往審力差大戶諸役書役任賄低昂富輕貧重公酌量參定輕重適均水鄉連災者率從輕緩榜出父老傳頌以爲公平前所未有邑有首出無糧地畝故皆徵銀寄庫以備堂支漫無稽考公申詳入冊定差并認學糧不復私費上下服其光潔邑故有健訟賄證官卒受欺者公明燭秋毫觸事卽首尾畢見有鹽商遺銀于市市民得之首官商聞之自言分兩塊數詣縣索領奇兵聞商言卽如其言冒爭爲己銀人莫能決公密令庫吏如數易以官銀以示兵兵云吾銀也以示商商不認乃重責奇兵而以銀予商由是人稱神明莫敢欺蔽吏書皂役故皆出入衙門橫肆無忌公德威神明詳輩悚息小過必懲稍干法度卽行革役非呼喚不得進署非給照不得出入公庭肅清無復打點之弊公持體清明而用心平恕閭閻動息毫髮必知其素稱兇惡者卽年遠必以法懲之然其人能操行自

肥鄉縣志

卷四十一 藝文記

四

新卽待之如故以是民皆憚于爲惡而樂于趨善公留意地方任事慷慨凡利弊有可興除者卽銳意行之本縣西南當漳滏二河之衝如邯鄲之燕米二口成安之寶公堤歲決爲害滄民地數十萬畝久議堵塞迄未能行公力主其議合四縣民力并爲堵塞且濬漳河俾復故道地方賴以免患公善政多端不能枚舉大率才廉公明四者兼備而一誠貫徹于中精神意氣又溢于政令之外故無感不孚無人不化風行草偃物阜民安三代之政不過是矣余竊謂觀風者當以異等薦不當混諸時吏之列豈謾語哉

趙平原君廟記

郭崇嗣

肥壤在戰國時本趙邯鄲地也城南八里厥地隆亢有平原君墓巍然高數丈望之若山然世代既遠有愚民及野僧乃于墓巔建娘娘香火以祈福利殊爲無謂墓之切東地勢稍坦有古廟三間中塑神像蓋卽平原君廟碑碣不存周圍有墓田若干畝歲久蚕食止餘十畝二分正德丙寅廟記不支西屯庄民鄭諒重建垂五十年廟貌復弛索家寨耆民蔡景賢諒子珣思紹前功復大加修飾大殿寢殿拜廊門垣皆規度嚴整金碧交映大踰昔制肇工于嘉靖乙丑仲春凡九越月而工畢乃懇予爲記予覽一統志及舊郡志皆不載趙王廟及平原墓惟邑志載趙王廟在城南八里而不言爲趙何王復徧詢鄉老年長者皆訛云趙簡王廟予疑未的然別無考據姑取簡子行寔書石爲記時嘉靖丙辰歲也隆慶戊辰有大風南來盤旋碑下碑忽仆碎庚午冬蔡進忠等懼泯其績復置石樹碑來請予記且云前碑仆矣予聞而訝曰

予曩疑非簡子廟豈其真非而神不欲耶乃取文獻通考等書徧閱之其洛州輿地考云肥鄉有平原君墓又考肥鄉八景趙陵春雪注云平原君塚高聳於田墓陰積雪春暮方融蓋即此也嗚呼平原君墓古跡之鉅者也兵火之後幾不復識豈非以文獻之無徵乎且我明修一統志皆明公秉筆于肥鄉祠墓中亦失考輿地遺而不載他何怪耶按遷史平原君名勝趙諸公子中之最賢者功在社稷彪炳千古考諸傳記赫赫若前日事沒而建廟一方享祀不絕固祭典之所當隆也乃今千載之後守塚斷絕儀物蕭條幸遺廟僅存使非鄭諒蔡景等之屢加修葺亦將變爲瓦礫之場與荒烟野草俱盡矣諒等之功烏可泯耶或曰平原君墓予嘗修邑志載之而墓顛娘娘廟則何以哉予曰有賢有司出必撤而除之或移建別所仍基前樹石大書曰趙公子平原君之墓

觀音庵記

郭崇嗣

吾肥之東三十里有鄉曰倪兒庄庄之東北隅有觀音庵肇建不知何時俗稱倪兒庄寺寺地十餘畝蓋諸僧耕種以供香火者嘉靖初兵憲劉公行文折毀淫祠凡境內寺觀之類芟伐殆盡茲庵亦在毀中時先祖待御受庵公鄉居嘗憩是庵有僧上姓者法名常泰弟子慧杲具有戒行頗涉禪理先公可其爲人且憫諸僧之賴失所依也乃用價贖之爲業給帖爲照寺由是獲存其後數年有遊僧號圓寶者不知何許人過是庵謂衆僧曰茲若建殿則衆有瞻依吾爲若化緣可乎衆許諾未幾群村畢集建大殿三間殿

肥鄉縣志

卷四十一 藝文記

五

成遊僧不知所往適有傭人于堂者力農辛苦積貲三十金觀殿成慨然盡捐所積塑大佛一尊鄉隣靳從周趙勛輩又於兩傍建小殿二所塑伽藍祖師其歲月先後皆漫無所紀隆慶二年鄉民張友者病且育發願募緣爲寺樹碑雙目忽明至是碑完住持性如常泰之徒孫也托鄉親趙勛求予文爲記予時方之河南僉憲未暇文也三年予以給假家居勛來復申前請且云先公嘗欲作記貽寺以碑石未具而止願爲文以續先志予聞之喟然嘆曰寺之興廢其僧之所爲乎昔者達磨面壁而少林顯忍師授法而黃梅彰慧能闡教而曹溪著皆地因人重者也茲寺之初矮屋頽垣寥寥一庵而已向非先公以常泰之故贖而存之則淪爲民田鞠爲茂草久矣迺今殿宇輝煌佛像藻麗門垣翼翼鐘鼓鏘鏘巍然爲肥東名利是可忘所自哉噫性如性朗輩若能繹思常泰之賢深明定慧之旨不愧衣鉢之傳則茲庵之勝將與少林同芳黃梅鬪秀曹溪接武矣勛之戰勗之哉

修關帝廟記

明張懋忠

僕常過醉梁之墟而撫公遺跡也公龍逢後裔世居中條北麓少負奇氣擅武勇儀度異於恒衆喜誦法左氏春秋闔閭有狂悖豪右徂擊殺之避地走涿鹿友善張翼德是時炎祚乾綱解紐日尋兵革昭烈以中山之胄懷大有爲之志突起末葉雅識公草莽間公以故共翼德同締手足盟於樓桑下傾身輔翊歷鋒鏑處利鈍百折不撓卒能奉昭烈定鼎西蜀衍旣墜之脉策一代之勳血食千百世之下原其始末公

蓋負五絕云興平建安羣盜並熾割據土宇中原逐鹿未判誰手功名之士惟力是附棄國難而折節孫曹比比也公鑒天命未改景從孤子正系窳戾萬狀隨遇而安人所易惑公獨不搖公之明下邳敗績昭烈不絕如縷公落落無所歸誼不可委主母而死人許昌曹袁以侯子女金帛踵相接實欲以利結公公土苴之達曙之燭與日月爭明公之節致討黃巾解圍白馬曹南郡而褫魂禁燮水而歸命投之所向竹破土崩公之威最譎莫曹若最殘忍亦莫曹若文舉德祖敵履委棄握公掌上勢可刀俎加也乃凜凜公眞慄如對神祇及其逸入袁軍不行遏絕嘉嘆不置公之誠荆襄重地肩臂益州趙馬鉅才靡可輕措公處之晏然土瘠歲珍東比燧燧帖如公之才是五者生民之絕德抱其一足樹不朽矧身備衆善心貫金石功載旂常名垂青史豈與輔世勳伐可同日語哉廟貌竣事二三黃髮謀勒貞珉而命僕操觚粗陳大略如左至若肇建伊始僕曾祖群丞及大父司馬業畢其說於前不敢贅

李文靖公祠記

清東海張翼

肥邑之西有故宋相國文靖李公寢廟焉距數十武傳爲公隧道不封不樹也其祠則遺礎所存頽垣斷瓦而已余下車時輒慨然思有以克新之而力未克復竊自余平時讀古先正傳必謹識其里居俎豆之處以爲後日游歷所至或得一憑吊焉豈今幸服官而終忍湮沒置之耶稽公相業著在簡策者甚悉且不朽余又何所容揚厲爲獨是榱桷數楹廢興明代者凡幾隆萬間關葺繕其碑記人士能藏之然計其

肥鄉縣志

卷四十一 藝文記

六

時率因仍敝宇益以葺塗且席盛物力充拓故咄嗟易辦自鼎革來瘡痍未復更多救過不給又漳水衝突無恆時以故栢枿松檟鞠爲茂草必有以大創之益艱且鉅自丙申歷三載己亥余約俸錢所入計百金有奇悉出之爲工築費而民之踴躍用命者千百人採木者於原負畚者於道巧者職聖斷者引繩始於秋抄越月而歸然告成瞻拜之下爰進諸衿庶而語之曰爾多士其亦悉予表章之苦志乎夫公以深沉正大之氣光輔宋室其行事卽難枚舉而觀其先幾慮患之志約以一言亦曰格君心之非而已夫源潔則流自清也本端則末自齊也今國家際永清之烈以創始而裕守成乃水旱盜賊之災亦所在時有令得如我公者起而凝丞左右吾知進外寧內懼之說建久安長治之規當不第坐鎮雅俗已者則我躬之所自厲與多士之所訓行舍公又奚式哉士居恆預養公輔之器必儀型古先一人爲之的而期以赴之誠心公之心則晤之於詩與書見之於藝與墻皆是也奚待入廟始肅觀瞻而或靡所仰止則無以激發其志氣而交相勸幸庇公宇下因與考德問業其中儼如公之日監在茲陟庭而上下焉其不爭自濯磨期勿愧古大臣風烈者無有然則表章之役雖欲已之烏得而已之若夫時風雨以護其基勤蓄洩以厚其址則卽以俟後之繼起而同志者

函樓記

賀應旌

己丑冬十一月函樓成客有揖主人而問曰樓以函名固善其於主斯樓者奚取焉爾不見夫江河之水

乎其在江河也洵焉洞焉無所不有及分流于支別之外而斯須不能容矣不能容而強以容名惡在其爲江河之實也語未竟主人急起投杖而再拜曰斯言過吾師丈人遠矣性浮而動靜可以治器淺而福裕可以治質隘而澆德可以治才庸而疎數可以治主人四病業兼有之急則佩章緩則佩玃以當警觸不亦善乎客退而語人曰吾與主人論樓而得論學法匪徒竊其似而務覈其實持己持人處事其一以貫之矣

遷接引佛記

邑人郭鳳翱

從來國運之盛衰關乎人材之消長其消也必有以厄塞之其長也必有以振作之事若偶然數歸前定旁觀者之計算與夫先事之燭照總無所用其力焉爾我肥鄉素推文獻之邦明嘉隆間人文稱極盛一時科第蟬聯冠蓋接踵泊萬歷初載忽有李朝綱者不知其爲何許人乃捨身出募於燕趙豫晉之間得銅數十萬觔欲建接引佛於邑之文殊寺畚插已具而棟宇未啟爾時邑侯善堪輿聞其事驚訝良久已而曰果行則邑之僧肥民瘦矣卽下令寢格不行佛暴風露泥塗中者三年及邑侯遷秩佐貳代庖朝綱尋出資緣舉之佛像連座幾三丈許而殿宇轟出雲表東視文宣王廟高倍數尺嗣是肥邑諸巨室乃漸衰微而每科登春秋榜者寥如晨星可指此豈特僧之肥民之瘦已哉議者輒歸咎朝綱妄建接引之故民則無知士則懷臂而當事者以傳舍因循置若罔聞迄今六十餘年其議雖存其事未舉臨舞焦邑侯

肥鄉縣志

卷四十一 藝文記

七

蒞任詢其由毅然曰是誠在我乃托余相地於邑之北郭曰井堂寺者其地坦平夷曠慨稱神居爰卜吉於余歲壬寅之春二月初旬鳩集工匠移佛此地仍繕葺寶殿以覆之不匝月工告竣侯曰佛得其所矣不復受人擲擗而儒風無阻從此彈冠鵠起所關於邑之風化匪渺是不可以無記余因授簡濡筆而嘆曰肥六十餘年之厄運豈以一接引之爲也而接引適當其會人遂嘖有煩言向使接引不建湮塞如故人又將誰咎耶大抵天地間一數而已矣數則難逃朝綱之建之者數也邑侯之徙之者數也卽接引之爲所建爲所徙者亦爲數所乘除也不然接引則菩薩之別號慈悲六道普濟群生憫士子之困窮悵文風之厄塞寧漠然不動于心而竟與文宣大聖人爭雄長于六十餘年則何爲也哉明歲屬當大比戶鳴一鏞人標一幟有蜚狐先登者有斬將擒王者科第蟬聯冠蓋接踵雖沙門淡漠未必皆佛之靈應而人則因此鼓舞亦未必非佛之激發不可盡曰無功也至接引佛出處載在內典余不必贅姑志遷佛事實垂諸石以存邑侯善政之一端云

修城等項記略

錦川王建中

一件爲飭催事遵奉 府檄會集闔邑紳士公議修復舊城於雍正九年二月初四日據紳士張瑞生等呈稱肥邑城池自康熙乙巳淪沒至今六十餘年縣治東偏輪將不便闔邑紳士百姓情願量力捐輸恢復舊城生等承任首事分班料理事在寔行並不推諉等情據此將紳士姓名造冊申報府憲

一件爲隨衆願捐修復事九年二月十一日據鄉民王國治等呈前事稱紳衿倡議捐資修復生等亦願隨衆捐輸不多拘寡幫修四門等情據此將鄉民各姓名造冊申報 府憲 一件爲舊城之修整有緒 文廟之遷復宜圖懇賜詳請憲示以便次第舉行事九年九月初七日准儒學牒呈前事稱本月初六日據闔邑紳士張瑞生等呈稱舊城坍塌公懇興復即蒙王老父臺檢閱原案首捐俸銀一百兩以爲通邑之倡設簿勸捐擇人董事自春徂秋四門樓堞以及官署堂舍衙房庫藏牢獄等項粗已完具惟學宮一項尙缺而未備念舊店營之學宮原係闔邑捐建生等情願各捐車輛移過舊城重爲修葺但事關大典生等未敢擅便懇請牒縣轉請詳 憲批示遵行等情由學牒呈前來准此據情詳請 各憲批示遵行嗣蒙 本府楊批仰候查卷轉請批行飭遵繳蒙 布政司王 批 候轉詳繳蒙 刑部尙書署直督劉批該縣城垣等項既經建設舊城則 文廟自應敬謹遷移以便就近瞻禮肄業繳 一件爲謹報遷復舊城衙署日期事竊照肥鄉縣舊城自康熙四年漳水淪沒暫移邑之東偏居住迄今將七十年矣闔邑紳士人民以舊店營僻處東隅西南北三鄉因公赴縣大有不便僉稱情願量力捐輸共勤盛舉 卑職隨將任事衿民冊報本府又倡捐養廉銀百金四路衿民莫不踴躍樂輸凡城門衙署庫藏牢獄學宅捕舍挨次修舉週圍上垣增築高厚于雍正九年十月下旬次第告竣茲據闔邑士民公請遷署前來 卑職謹擇于十一月十五日自舊店營遷入舊城之新署所有捕官并

肥鄉縣志

卷四十一 藝文記

八

庫藏牢獄遞馬馬夫等項一同移徙合將遷復日期報明通報 督巡二院憲並 藩臬道三憲以及

本府 捕府 分府 河廳四憲 一件爲舊城之修整有緒等事九年十二月二十三日奉 本

府信牒蒙 布政司 王 憲牌蒙 刑部尙書署理總督劉 批前事仰縣官吏照牌事理即將該

縣官署從前暫居舊店營係 題明奉

旨欽遵之案且相沿六十餘年一旦改歸果否便民其修設各項需費若干有無派累逐一確查明白詳覆核轉等因到縣蒙此竊查肥鄉縣舊城自康熙四年漳水冲决暫移東鄉舊店營僦民房以爲衙舍曾經詳 題議覆俟水涸之日地方官設法修理奉

旨依議欽遵在案六十年來道里不均輸將不便且倉庫牢獄牆卑室淺罕所防衛胥吏辦事俱係賃房散居因循苟安勢非得已嗣因漳水久涸肥之紳士日謀修復五十六七年間呈縣呈府呈道屢經批行飭查案卷登積前令王能任曾經設法修築土城基址又建縣署前堂後樓十餘間不及繼而中止雍正八年九月內 卑職到任查閱卷宗訪問紳耆始知從前端緒迨九年二月上旬會同全城官傳集闔邑紳士耆民公議僉稱舊城係四鄉適中之地士民考課輸賦至爲便適急宜修復以慰輿情于是設簿勸捐 卑職倡捐養廉銀一百兩擇士民之品行而殷寔者分掌其事木石灰瓦時價平買匠夫工役俱給僱值入則有紳耆之收管出則有匠工之領狀不假胥吏不用差役自二月初旬興修至十月

初冬凡城門衙署學宅捕舍庫藏監獄各工粗完週圍城垣仍如前任王令照里分工各鄉鄉約自督自築卑職不時巡視獎勵歷五日而更休越二十日而竣事卑職初捐百金後又緒捐百金通計所費共二千六百八十兩零定由士民踴躍樂輸並無絲毫派累及至十一月各工粗完旋據士民赴縣敦請僉稱出貲助力人等群望早遷以慰所願倘不亟遷則失望生悔等語卑職以其情詞激切遂于十一月十五日遷訖業經通報在案應否咨題伏候憲裁核轉等由詳覆嗣蒙本府楊批仰候據轉繳布政司王批仰候核轉繳刑部尚書署直督劉批仰將該縣從前舊城衝決暫移舊店營之詳題部議俟水涸之日地方官設法修復各原案逐細查明裝叙妥確詳請核奪題達繳等因蒙此隨經詳覆本府據轉在案一件爲遷復舊城方新大典功成有待謹採衆議請將隙地餘基詳明辦公事查肥鄉修復舊城已經申報遷署在案又學宮文廟亦經據呈詳請憲批准遷修蓋在案目今聖殿三間已成教職署舍亦備惟是兩廡櫺星門明倫堂崇聖祠等項未克興修關聖載在祀典而廟像未建省牲無所凡此二端最關大典再四門之外不可無橋梁以通水道以利行人查有縣署之前學宮之後在街兩旁餘基并無主隙地人人爭欲得此以爲貿易之所但官既不以遍給民又不得以擅占恐將來不無衙役市棍心生覬覦以起訟端卑職管見如有情願捐資辦料分修學宮橋梁等項工程之人應酌發印照分給管業仍文明地基數目按照下則陞科辦糧以示鼓勵以杜爭端其餘工料或有不敷卑職再爲倡捐添補紳民衆議僉同可否允從伏候憲臺核奪通詳督憲藩憲嗣蒙本府正堂楊批既經通詳仰候督藩二憲批示繳布政司王批仰廣平府作速確議詳覆繳刑部尚書署直督劉批仰布政司查議詳奪繳等因蒙此隨經文明各隙地基址畝數并照依行差地陞科辦糧定議詳覆蒙署本府宋據轉詳覆蒙布政司王據府詳加着轉詳奉刑部尚書署直督劉批如詳飭遵繳一件爲報明事九年十二月十九日奉本府正堂楊信票准直隸副總兵李移會設法料理營房務令原防弁兵一件移駐巡防共保無虞等因查營汛兵丁原爲防守城池倉庫護解錢糧重犯而設官署既經遷居自應令兵丁一併移防但營房一項如欲詳請動帑興修則估計題達議覆施行須時必久且城垣衙署既屬捐蓋則營房亦不便再行題請自應設法料理肥邑防兵八名須蓋房十五間始敷居住隨以八九兩年開除未盡連正帶耗共附餘銀六十兩零詳請爲蓋造營房工料之費其餘不敷再行倡捐設法料理嗣奉直督劉批此項附餘錢糧前於審題革令陳紹芳濫徵案內叙明應行查明開除之項則徵存銀兩仍應起解報部未便率請動用仰布政司飭遵繳緣未批准隨經多方設措銀七十六兩併墊賠養廉銀七十四兩修理營房十五間圍牆十五丈二門大門照壁俱備于雍正十年四月十五日竣工通報在案至文廟關廟于奉憲批允認地辦糧之據士民報捐備料請撥地基者源源而

肥鄉縣志

卷四十一 藝文記

九

至遂建大成殿五間頗稱宏敞壯麗九年冬移建殿宇三間改爲崇聖祠殿之東西建兩廡各五間前造櫺星門三楹壯似牌樓門內開鑿泮池池後建戟門三楹街之東西豎牌坊貳座周圍牆壁共築一百十餘丈廟西造明倫堂三間另爲一院花牆月臺俱備規模闊大形勢整肅不似從前舊店營之卑陋矣 關廟大殿三間捲廊三間內塑 聖像旁列侍像後建追封三代殿宇三間側造僧房各二間前爲戲樓甬道頭門二門俱全圍牆五十餘丈規制宏麗廟貌維新俱于壬子七月竣工報明在案按修復舊城工程浩大從前歷任自康熙四十四年起屢據士民具呈詳請案卷疊積究未興工迨前令王公于五十八年始創有縣署之前堂後樓數楹築有土城基址數版因不能繼而中止庚戌歲秒余蒞任未幾查閱從前卷宗思復城之舉未可造次因于辛亥仲春集紳衿公議僉同力圖恢復各願捐金任事士民具呈到案余即將各士民願捐姓名開冊報 府然尙慮董事者未能同心樂捐者艱于物力未敢遽料其必成但事宜勇往迅速以鼓勵其心志于是首捐養廉爲倡設簿勸捐擇季春之吉而興工焉亦不拘泥于詳報之虛文自春徂秋修整規模粗具紳士見修復有緒益加踴躍因有請遷 文廟之呈是不得不爲據詳請示及一陽之月城工衙署庫獄等項俱已告成士民環請遷署以慰輿望因爲申報遷署日期時唯 文廟修理未竟 關廟及橋梁急宜修建于壬子春初請以署前街旁隙地給急公捐修學宮橋梁工程之人業蒙允詳興工修建俱告落成又營房及汛兵防守之居

肥鄉縣志

卷四十一 藝文記

十

勸捐未能興修無項因請動支徵存附餘銀兩未蒙批准亦已勉力捐修竣事各詳案 憲批皆修復舊城之始末事實亦余百計設法而成雖不敢居功然案卷應誌以備考云

王公建中德政記

邑人宋 錦

公姓王氏名建中字懋庵錦縣人雍正癸卯科進士授肥鄉令持體精明任事慷慨不畏權勢不容干謁與人坦率而情真澁任之始慨然捐俸修復舊城辛亥之春奉建倉厥兼立四門次修衙署以及行臺營舍翕然就理而遷移文廟修築垣塹越八月而工竣一陽之望鵬徙而居紳民莫不感悅壬子續建大成殿兩廡靈星門戟門明倫堂關帝廟凡列祀典靡有缺遺而邑之古制復矣公性淡泊厭人慶賀餽遺閏五月二十七日攝郡城同知篆十屬鹽典各以儀禮晉公概却不受隨諭送肥鄉學工辨班公事闔屬紳士儀物悉還之所以公之壽辰鮮有聞者錢糧火耗以加一三爲額過此卽標長封實貼大門勅花戶速爲領去莅任甫年餘修城捐輸約三百金養廉俸薪傾囊無所惜日用蔬菜米布俱詣市交易價值無分官民受詞不厭煩瑣隨到隨剖決案無遺牘用刑惟巨惡大奸不少寬貸餘則小板量責令其知警民皆服其居上之寬他如嚴夜警以彌盜賊禁賭博以懲游蕩修縣志以記縣制善政更難更僕數今略記其大端云

重修文廟學宮記

嘉慶二十五年

國家崇儒重道建文廟以祀

聖賢立學宮而興教化故祭以上丁執事者共嚴對越限爲月課入泮者均受裁成典至重也肥邑自康熙三年漳水淪城文廟與學宮俱廢雍正三年邑侯王公始創其基乾隆三十七年邑侯戴公大啟其宇迄今計之已歷四十餘年矣廟貌雖存不免風雨之剝落講堂猶在難堪瓦礫之凋殘生等入廟而相儀徒深肅若登堂而請業何勝慨然迨我 任 二夫子司鐸於茲均有重修之願而苦於獨力之難成爰是謀之同人共襄勝舉奈規模已就丹雘未施財力遂已告匱幸蒙我 邑侯姜老父師慨然以告成爲己任獎勵士庶完此鉅工復稽禮文添造祭器舉行書院定爲課程遂使里豆庠籩用展椒漿之獻成人小子咸蒙作養之休士習與民風日臻乎上理哲我 姜父師與 任 二夫子之惠也謹爲記

重修資文正公祠堂記

同治元年

教諭趙文瀛

資文正公元之名臣元之名儒而肥鄉其故里也間嘗博稽史冊高其風懷其地想見其爲人而涑水肥鄉相距遼遠興思親炙苦於無由咸豐辛酉承乏是邑九月抵任急詢公之里居始知公係縣屬之城西村人有祠有墓有護墳地三十二畝以供香火歸儒學經管每年春秋致祭儒官行禮由來久矣同治初元二月上戊躬往致祭見祠堂墻垣傾側門戶摧殘神牌不知失落何處祠外樹皮剝落枝幹枯焦墓亦邱隴僅存漸就傾圮急詢其故始知去歲三遭兵火十一月賊扎營翟固等村地方逼近最

肥鄉縣志

卷四十一 藝文記

十一

當兵衝蹂躪之餘頽廢至於此極瀛心傷日擊有志重修次日赴府送場未遑修舉四月考畢與副齋劉光陞商議重修各捐廉俸舍舊圖新而城西苦無讀書人難以承辦因翟固距此切近廩生郭慶雲武生尙政俱結實可靠因以監修之責囑二人廢者修之墜者舉之塗葺丹雘煥然一新爰擇良辰恭設神牌虔誠致祭而重修之志於是始酬自金元以來浮屠老子之宮遠近相望而名臣名儒祠墓任其荒廢無人經理其間此亦備宮者之責也因誌重修巔末如左而郭生尙生其勤勞亦不可沒云

肥鄉縣創建昭忠祠記

同治二年

教諭趙文瀛

國家褒揚忠烈典禮攸隆凡紳民殉難及陣亡者崇祀昭忠祠所以厲臣節振民風也肥鄉時當

聖世二百餘年兵革不興紳民鮮有兵死者故昭忠祠久未建立咸豐十一年二月山東教匪及土捻各匪同時蠢動連陷曲周清河廣平三縣肥鄉正當兵衝楊樹屏明府修城垣除戎器誓以死守四月十三日賊據縣境胡盧營四出焚掠城內遷徙一空十九日賊鋒愈逼樹屏激厲人心衆志成奮鄉團俱告奮勇獄囚亦願効死行間二十日樹屏帶練勇劉光陞學博帶鄉團赴胡盧營進剿前鋒甫接軍中有怯懦者策馬先逃後隊驚潰前隊陷入圍中附生呂諧宮挺身出戰中傷陣亡屍身未獲樹屏光陞奮勇冲殺增生張夢星獨力斷後擊退賊衆收隊而返查檢練勇鄉團獄囚陣亡七十三人樹屏據寔轉詳懇請

賜卹久未入奏同治元年清明節樹屏卽關帝廟後殿廂房設立義勇祠命濂代撰祝文率僚屬安神致祭樹屏光陴唏噓泣下哀不自勝蓋憐其志之堅而命之苦也十月山東降衆張錫珠等五十三人倡亂濂與樹屏光陴操演練勇整飭鄉團修造戈矛教習隊伍以資防剿十一月二十七日賊抵館陶之房爾寨楊竹坡外委率練勇三百人赴東章堡會同東路各團防堵二十八日賊抵廣平之寺郎固距縣東南界僅四五里濂與樹屏秘議調元固一團赴河頭堡迎頭堵截調西南四團駐元固以爲聲援並調各團相機策應知會竹坡回兵以爲各團救援二十九日清晨西南四團未到賊已分路攻撲元固一團首先接戰鄉團長槍多而火器少又兼步不敵馬難遏奔衝團長團丁先後潰散而河頭堡油胡寨陣亡生監尤多屯庄營團總武生程榮凱率四村團丁與賊接戰死傷相繼視死如歸與各團長受禍最慘幸竹坡敗賊西賢店賊鋒大挫次日遁出境外查點各團陣亡文武生員十三人監生四人團丁一百三十餘人樹屏據實轉詳懇請

賜卹亦未入奏二年三月樹屏調赴軍營因義勇祠在關帝廟後殿廂房規制不稱函囑張夢星等在關帝廟大門內東偏創建祠宇三楹中設神臺安置陣亡團長東西兩偏各設神臺安置陣亡團丁以示區別團長各設神牌書寫銜名團丁立一長牌總書姓名以歸簡易祠旣成濂函商樹屏撤去義勇祠呂諸宮程榮凱各團長崇祀中間胡盧營陣亡團丁禱祀東偏各團陣亡團丁禱祀西偏以歸畫一而

肥鄉縣志

卷四十一 藝文記

十一

顏其祠曰昭忠從

國家定制也濂於胡盧營之役尙未抵任而呂諸宮生員也歲試開除本係陣亡難言病故謹會同光陴將呂諸宮陣亡情節申明學憲並託金鏡軒太守極力懇求楊稼生學使移咨王蔭堂觀察轉詳文星巖制軍奏請

賜卹然僅呂諸宮一人不在學校者本學例不準報也程榮凱等十三人陣亡情節亦申明學憲蒙批俟詳明督憲會咨再行具題則

賜卹不過少遲時日耳預爲崇祀恭候命下亦仰體

國家褒揚忠烈之雅意云爾則樹屏之厲臣節而振民風者所係豈淺鮮哉是爲記

重修敬一亭記同治二年

教諭趙文濂

敬一亭者藏書籍之所也各縣皆有之而肥鄉老屋三間漸就傾圮欲重修之軍書旁午不暇及也一日練局紳士張廷昭張夢星王琴堂李占奎告濂曰自軍興以來設立總團練局飭某等專司其事而假館以居迄無定所由來久矣方今兵亂孔棘鄉民避難入城者紛紛房主屢請遷移以便栖止而城內房屋所在皆滿寔在無地自容查敬一亭係公所因其舊址舍舊圖新庶幾一勞永逸敢以請濂應之曰昔魯

僖公芹藻鸞旗開設學校而在泮獻賦在泮獻功皆受成于學非以文事武備一以貫之乎況庠者養也校者教也序者射也謹庠序之教修其孝弟忠信入以事其父兄出事其長上可使制梃以撻堅甲利兵則有勇進以知方矣古人教民所以涵育之而薰陶之者無異術卽無異地也今敬一亭殘破極矣蒙諸君雅意得復舊觀濂之願也敢不惟命是聽議既定鳩工庀材擇日興工中因舊基建正房三間仍顏之曰敬一亭以爲諸紳民支發會計及宴息之所右建耳房兩間以藏軍器左建耳房兩間以作庖廚修築墻垣刪除榛莽院宇恢闊老樹輪囷濃陰四合戶牖間皆作綠色較向之荒涼寂寞迥不侔矣亭旣成擇吉移居而團練局遂有定所自時厥後太平無事則夏絃春誦書籍發爲文章軍務倥偬則敵愾同仇禮義以爲干櫓顯謨承烈文武兼資是合天祿閣籌邊樓而一之矣然後知張廷昭張夢星王琴堂李占魁之爲計深且遠也後之官斯地者甚勿謂寓人我室久假不歸而我馬塵氣非禮樂詩書所可滌也蓋敬一亭已傾圮借團練局之力而興復之非團練局無定所假敬一亭之地而久據之也是爲序

肥鄉縣重修文廟學宮及文昌閣記

趙文瀛

咸豐丁巳劉曉山劉光陸兩廣文因文廟殘破勸捐重修派州同呂文翰貢生趙綱增生張夢星監工甫修大成殿及東廡而蝗大至所過之地禾稼一空因而止工餘錢三十九千五百文飭趙綱張夢星分存俟年豐再爲修舉而旱蝗交迫兵亂頻仍因循未果辛酉二月曉山卒濂於九月抵任時兵火正急光陸

肥鄉縣志

卷四十一 藝文記

十三

又調赴懷慶軍營與楊樹屏明府集衆守城日不暇及同治壬戌十月迄癸亥九月兵禍愈急與樹屏光陸修城濬濠造軍器練鄉兵防剿兼施幸而無事十月兵亂漸平光陸以終養告歸十一月樹屏升廣平府知府甲子正月赴任臨行囑濂曰去歲修城門弔橋伐取四鄉廟樹以濟要工其餘剩木植交紳士變價充公除修昭忠祠敬一亭及義學並立陣亡殉難紳民婦女題名碑外錢如有餘卽將文廟學宮及文昌閣重加補修二月上旬與紳士集議時趙綱已先卒呂文翰遠在鄉卽派張夢星會同王琴堂張廷昭李占魁監修崇聖祠前後簷瓦俱脫落簷檁斷折另換連簷插飛及簷檁一補修上蓋文廟引路西碑樓破裂重加圻修引路東碑樓上蓋殘破重加修整二門簷瓦脫落簷檁斷折另換連簷插飛及簷檁一補修上蓋靈星門木架欹斜瓦俱脫落重加圻修東轅門補修上蓋西轅門久經傾圮重加興修照壁東圍牆鼓裂西轅門北牆亦傾欹重加圻修忠義節孝祠補修上蓋門多殘缺一律補修文昌閣補修上蓋二門殘缺太甚重加圻修大門後殿圍牆隨處粘補明倫堂前後簷瓦俱脫落簷檁壓彎後簷另換連簷前簷換檁三修補上蓋東齋房傾圮無存重加興修西齋房補修上蓋並換簷檁一二門前後簷瓦脫落另換連簷補修上蓋並換明柱二大門瓦俱殘缺西牆閃裂重加圻修照壁略加補修二門東腰牆一道傾圮已久重加修築而學宮衙署亦賴諸君之力重加粘補以便栖止大工于是乎告成夫文廟學宮一邑人文聚會之處也肥鄉自兵亂以來蕩析離居未遑誦讀樹屏興復書院重修義學以培士氣而振文風

升任後猶以文廟學宮諄諄相囑則偃武修文造福于紳民者豈有盡哉官樹變價充公及趙綱張夢星所存餘錢尙不敷用又動樹屏棉花餘息一百八十七千零以濟要須則樹屏倡議于前捐資于後所以惓惓於肥鄉者誠有加無已矣是役也王琴堂張廷昭李占魁監修勤苦不遺餘力而始能經手者則張夢星也惜光陞以養親去未能觀厥成耳

肥鄉縣志

卷四十一 藝文記

十四

藝文

誌

永年縣丞郭謙墓誌

明吳郡王 鑿

公長孫吳江尹郭自任奔喪走使京師乞銘郭故家河南鹿邑公祖諱仁美洪武初以歸附民至肥鄉父諱晟龍江衛經歷以清謹聞配周氏實生公公諱謙字致恭少入郡庠爲弟子員以科目致用時妖人唐賽兒捕久不獲會其黨千餘人自新德至肥鄉伏旁舍將亂人患之弗敢言公入白其狀于府守懼弗出同知獨奇公卽委公捕之公曰是當以計取不然且逸會暮夜先以衣物散民家垣外佯言中有盜入跡至賊所賊不悟其爲己也遂盡獲府因以公部諸賊赴闕正統初公年二十二英宗御批授本縣主簿賜衣二襲寶鏹二千貫馳驛之任公居官多方略旁縣有事久不決多被檄往無不立辯盜賊朝發暮獲人號爲神明境中帖然九年赴吏部于例當進二級公以親老乞近地未任以憂去己巳之變大理卿王偉以巡撫駐境土聞公名召與語大悅薦公于朝奪情授永年縣丞時邊報日至公聞命墨衰以往不避艱險防禦撫綏民用安堵時有以修城繕兵爲言者公曰止今民且奔竄又驅之役是逐之也其誰與守且賊必不至已而果然景泰六年致仕以子忠貴封奉直大夫戶部江西司員外郎

處州知府郭忠墓誌銘

長沙李東陽

肥鄉縣志

卷四十一 藝文 誌

十五

予聞淵藩張布政稱良有司得知處州府郭君廷臣處人相與建生祠奉之未幾君卒其子鄉貢進士郭方以母憂居肥鄉馳省君至杭得訃奔至處返君喪道鎮江奉楊按察應寧狀上京師請予銘蓋其母之葬予實銘之矣初君舉成化己丑進士官戶部爲主事督收京儲會計精當尋督天津諸衛及汧石諸場芻賦宿弊盡空屬吏以金餽郤弗納遷員外郎督儲臨清見伐桑棗貨食者畀之米且諭之曰植物不易貨且盡當復何貨民感悟遂不復伐會議開邊欲君督餉辭不獲比出境不遇賊而還進郎中除處州寺久闕倅二更署吏緣爲姦君至嚴防禁籍記條教事無留案尤精判決人不敢欺嘗有群盜久弗獲君憂而禱之是夜夢衛廩穀溢因廉得米廣者爲盜窟併獲賊證衆以爲神愛民節用禁胥吏勿下鄉并還逋民萬餘口復舊業歲旱禱雨雨輒應有蟲傷禾稼爲文祭之三日而死有瑞竹瑞蓮嘉禾諸物或以頌君君辭焉獨嚴馭下貪官黠吏皆斂不敢肆惠歸于民民是以思之處人輯所立條教曰爲政紀綱曰括蒼規約以傳其所自述有詩文若干卷銘曰世有毀譽或非厥情面背則殊矧惟死生漸有郡侯郭姓忠名蒞郡六年而棄其氓氓思我侯侯我父兄劬孰我佚擾孰我寧泣以送之有淚吞聲侯也何知我情是嬰侯生有祠匪悅與營曷以驗之于侯之行有考績者視我茲銘

貴州道御史蔣勛墓誌銘

廣陽車 璽

公諱昉字世功別號葵軒祖祥任南京虎賁衛經歷父鳳嘗爲臨淄令母顏氏生三子公其季也幼秀朗

動止如老成人誦書若宿習居家克篤孝友與人交敦尚信義隨侍父于臨淄時彭澤先生者爲司訓以春秋鳴公師事之輒得其大旨領成化丁酉鄉薦辛丑登王華榜進士授河南濟源縣知縣民俗穢悞喜爭公至通經賦廉賦胥擊豪右以僞果集事甲辰歲歉撫養瘡痍寬減逋負民賴全活縣境臨山西間有逃竄山谷黨助蔓寇者公多方掩捕境用以寧擢貴州道御史敢言不依阿泐忽奸回憚焉宏治改元往給賞紫荆等關軍士己酉查逮東糧儲庚戌巡視居庸等關躬歷險阻不憚勞勩完城堡肅部伍權貴私侵軍士者聞之潛遣還辛亥出按山西壬子丁父憂甲寅服闋改山東道陞河南按察司僉事分巡河北河南道往蒞洛西至陝州疾作輿歸寮友相率入問公泣曰君恩未報母年垂老今不可起矣奈何諸公相與渾淚而訣銘曰英英乎其志之銳也井井乎其邑之計也義義乎其豕之觸也肅肅乎其刑之錄也懇懇乎其勞之勩也嗟嗟乎其蘊之闕也

河南道御史郭郭墓誌銘

淮海蔡 昂

公諱郭字于蕃姓郭氏廣平肥鄉人公生有聰明穎悟書一過目輒能誦至于再三則終身不忘十歲從知府公于京師時州守贈少保象峯夏公雖未第已有盛名知府公延以教公一見喜曰此奇童也成化庚子舉于順天後又游遂菴楊公之門同游多名士而太原喬公宇北地李君夢陽爲冠人推君爲喬李之流亞而楊公亦謂門人曰郭生固奇士會知府公與太宜人相繼卽世公以祿不逮養無進取意所親

肥鄉縣志

卷四十一 藝文 誌

十六

或規之曰以子之才終不爲世用乎公瞿然起謝宏治九年與夏公同舉進士是年除知吳江縣踰年丁大父憂十四年服闋改除英山十五年以才可治繁調清河居兩月被召除南京河南道監察御史初得吳江大父尙在臨請教曰爲政有體獨不聞慈愛爲縣令體乎公性素嚴明用是政主平易而以嚴濟之作興教化獎予人物廩庾橋道無弗飭者沈生漢有異才年少名未起公見其文奇之爲之授室而厚其資給漢後果登第爲名給諫有費全者武斷鄉曲且持官府短長公召而諭之禍福薄責釋之後不改實于法英山負險難治乃用其所嘗效者蒞之民以協服又奏旌孝子段宏仁以勵俗在南臺力任激揚不畏強禦巡督江北倉儲搜剔吏蠹疏滌民瘼諸路賴之獨其嫉惡大明雖以此得名亦竟以此撥禍御史某按南畿登覽廢政公和其詩有箴切語某銜之滿歸言于權要遂效公致仕時正德三年也公雖被抑耿耿自信閑居三十年不柱尺寸視昔從游諸老蓋無愧云銘曰物稟靈異各擅其能鸞以德著鸞以威名惟德惟威兼備爲美我求其人以立政軌憲郭公傑出之才鸞停于邑鸞擊于臺在物爲祥于人爲異迄不我容乃與禍會能螫其身不挫其氣考公始終庶幾無愧我之銘公蓋激于義祥歟異歟以俟來世

清澗知縣趙臣墓誌銘

潞陽盧 英

君諱臣字邦直姓趙氏樂菴其別號也先爲山西襄垣人國初移籍肥鄉縣大父奉天順間儀真主簿父

詠正德初河南鎮平儒學訓導君幼有穎悟資補邑庠弟子員爲文務明暢每得主司稱賞廩食者幾十年正德癸酉登順天府鄉試榜明年會試禮闈下第入太學卒業嘉靖癸未秋八月赴銓司授山西介休縣知縣介休素稱難治君有廉公聲期年而政修民服乙酉入覲授陝西清澗縣君素嬰疾視事僅兩閱月遂以疾歸君爲人和易而操不可奪與人交坦率而情真往往鄉閭士夫稱其美兩作縣而歸囊橐蕭然尤人所難予聞諸鄉評常接其風采深嘆宦游而歸如君者真好消息豈易得哉歸時當鄉飲期生徒相與請而置之賓席鄉人榮之無何疾篤卒銘曰仕以學殖駕言治生或有墮志假途爵纓曾如君志卓之而勃兩爲縣令並有清明解組歸來蕭蕭騎鳴考素履蹈允如鄉評胡爲不樂胡爲不榮學以仕敗視此誌銘

鄉貢進士杜璧墓誌銘

滁陽盧 英

君諱璧字天瑞世爲肥鄉人曾祖敞神武衛經歷父春鎮平知縣二子長曰奎靜樂縣訓導次即君也君資性穎異學問精博少年廩食邑庠人皆以經解期之正德己卯中京闈鄉試榜以數奇春官不售既而人太學嬰病卒聞者莫不以未究其用爲恨君爲文操紙筆立就不事雕琢而理致雋永好作詩取材漢魏律準李杜陶劉而不事蹈襲自成一家閉門歌詠音韻冲雅如金石聲事親孝與兄奎共業儒食菜道宛然蘇門對床風致也銘曰學務實匪以名時所趨名之成君收桂籍夙協乎鄉之評負材而學弗究

肥鄉縣志

卷四十一 藝文 誌

十七

名立而用未形爲我心測渫而弗食虛王明吁嗟乎生睥睨一世如君之沒也寧

贈太保潞安同知張應麒墓誌銘

吳郡申時行

司馬肥鄉張公既受命則疆吏屢告急朝議洵洵余數從司馬受壽筭靡不稱上意而邊師報捷滇師遂緬寇縛其渠魁生致闕下上登樓受俘叙功首司馬加太子太保予誥得贈其父西瀾公如其官母宋繼母陶皆一品夫人會陶太夫人病革司馬七疏乞覲省上憐而許之歸未抵家而太夫人之訃至司馬以聞有詔賜祭父若母偕所司爲治墓合葬于是司馬以書來曰孤先子常仕至貳守其才志未及竟而以屬孤孤之所爲公家黽勉分守者咸出先子子幸知孤其爲先子及兩夫人銘而納諸壙孤死且不朽念不敢重違其意乃許之西瀾諱應麒字時熙西瀾別號也先世故合肥人永樂初徙江南大姓寔邢洛於是公高祖德山始家肥鄉一再傳而曰嘉曰溥父子爲邑諸生溥生巡檢韶韶生訓導悅悅娶于郝公之女也公生有異質束髮爛文辭應明經選第一廩學宮貢入太學凡六試弗售乃嘆曰咄嗟夫士乃窮年矻矻而需一第何爲者謁選吏部試高等通判潞安府兩考報最即選同知先是山西撫臣集民兵冀南請置潞安判專理主爵者靡知公才遂屬公郡倅領兵事自公始公至則汰其弱不勝戈者鈐束其強且好鬪者編隊伍飭器械明賞罰都御史會公鏡下其事諸郡以爲式行縣高平令某遣人壽公公庭斥之令嘯嘯避去閱兵偏頭關一切繩情卒不少借將領怵公謂衆且亂公不爲動兵亦竟莫敢譁已用撫

臣議令公兼總理營田復豪右所侵地萬餘頃教民耕稼芻牧歲省內帑十餘萬路多宗室驕亢難制公攝篆獨帖帖畏公甚于守督餉平刑關會賊突入卽移公保繁峙公誓衆堅守張疑兵賊亦逡巡不敢犯諸使者皆相詫謂公才代州糴粟于商吏多乾沒粟不辦監司檄公往諸商戒曰是不行苞直者卽相率輸如期州藏有千金鬻塵土中守吏私公曰此藏籍不載人無知者公叱曰爾勿溷我立籍其數諸使者又皆相詫謂公廉嘗再攝郡按察司以私賺公置下考大計落職諸使者又皆相詫謂公才且廉奈何以睚眦罷公獨無幾微見顏色飄然歸歸泮旬而司馬成進士知曲沃有卓異聲徵入諫議會柄臣非斥異己者公貽書曰寧得罪而歸毋惕勢而辱司馬竟蹇譔取忌補河南僉憲河南豪少年坐法各懷千金賂公求釋公拒不納隆慶改元司馬以按察副使奉詔馳封公尋病且革猶貽書司馬勉以立身成名語不他及旣卒之三月郡邑采輿論請崇祠學宮越四年而司馬任都察院右副都御史以詔恩贈公如其官萬歷四年司馬以兩考贈公兵部左侍郎又五年贈資政大夫正治上卿戶部尙書又三年贈資德大夫太子少保兵部尙書又一年遂有今贈云余讀華亭少師所爲公志以公諱于位不獲究其用深痛惜之乃司馬兢兢守庭訓奉公砥節爲天子裕國安邊樹功社稷王錫命而贈公八座余蓋知公不用之用大矣語曰厚積食報信哉銘曰蒙泉之流溢而成川累構爲臺其崇造天學學張公劬勞率職才足濟時位不滿德乃濬其源乃培其基是生司馬式穀似之經國籌邊叩叩翼翼帝曰休哉予嘉乃績何怙何恃有

肥鄉縣志

卷四十一 藝文志

十八

開必先何以恤之窳窳邊豆遇齋于前榮施于後不用之用食報孔厚崔嵬新阡將作是營刻詩于幽以垂厥聲

博興知縣梁桐墓表

郭崇嗣

此博興令梁公之墓也梁公少負才名赫然流燕趙間乃弗克大用而埋光以沒士林惜之嗚呼此余所以特表其墓也公諱桐字子琴號竹坪生有異質年甫十一從師授業日記數千言余大父御史公奇之及總角補邑庠生試輒優等郭北五里許有田舍公夙夜讀書于中邑士多從之遊者嘉靖丙午中順天鄉試主試者山東李滄溟也公爲人天性孝友重義輕利承順二母不少違有姊適李宸而貧公收養于家事以兄禮歲荒有夫婦就食河南鬻子于人而泣不忍離者公哀而贖還之公幼善爲文章尤工告作平居博綜群書肆力探討而于佛經與義衆所齟齬者獨能妙解宗旨同遊者皆自以爲不及也以敷奇五試春官竟不第壬戌謁銓授博興縣令下車初有疏刁民數千人于公請繩之法公受而焚之曰俟犯吾法當有處耳卒皆改行從善無罹法博地廣民稀多不耕之士公立法委官分丈徵熟停荒不數月逃民畢集而賦稅如限邑民趙秉科通竇尙習之女殺其本夫事出晦夜前官以女之夫兄成獄已久公閱其招疑之因密廉賈某者知其情設法問之賈不能隱竟坐秉科高苑縣地瘠民悍每編審等則惟沿舊册民率不服公被委令一縣民盡詣公所明定差役民遂翕然蒙陰縣賦重民逃乞公往平三日而事竣

云甲子當入覲民請立石紀政公却之曰增吾愧耳公才力精銳廉明果斷蒞官八百日而兼理隣邑事過半治績卓然爲列邑首兩臺先後薦剝者數次戶部以前令通賦註及例當改官百姓數千人赴臺保留然業不可挽矣公命駕士民泣涕擁送百里外旣歸絕意仕進閉戶讀書不語外事邑宰勾溪李公重公高致徵爲鄉飲大賓一應不復再出卒年五十有八所著有潛軒集藏于家余憶督學良齋王公當丙午校士取公與心齋張公及余曰此三生他日大器也今心齋公開府遼陽進官司馬勳流竹帛余以庸劣亦濫湖叅公獨抱奇位不滿德而逝豈非數哉

陝西副使郭崇嗣墓誌銘

張學顏

君諱崇嗣字承芳草塘其別號也其先河南鹿邑人御史郭子東邑廩生君父也東無子而鄒之子繼先有二子長崇登次卽君侍御公乃以君繼東後君生而穎敏有異質侍御公鍾愛之比就外傳不假督責能肆力于學每試輒高等聲名籍甚然入棘圍則輒北遊國學四方士與君遊者皆重君舉辛酉鄉試明年第進士除大理評事復晉寺副寺正遂繇考績恩得封其父母如制復疏請旌王恭人貞節又請移封其本父母隆慶丁卯陞河南按察司僉事分巡汝墳發奸剔蠹執法無私乃尋以生母唐恭人喪請告歸再起河南驛傳道署提學事所校士人人敬服治行爲兩河最癸酉陞湖廣叅議分守衡永悉心措注務舉其職衡永人至今誦之擢陝西按察司副使整飭固原兵備固原當戎馬之交寇數爲邊患公申法令

肥鄉縣志

卷四十一 藝文誌

十九

訓甲士竣埤塹屹然爲西陲長城值王恭人喪扶柩東歸服闕須次闕下當路者咸器重君思欲大用而君以疽發背卒公尤長于古文辭詩法漢魏所著有燕石稿祥刑錄草塘文集等書行于世至于陳詩二疏特奉尤旨讀者無不下淚嗚呼君儻得竟其志所豎立尤有卓異者乃位浮于才壽弗當德惜哉然跡其表見於大理中州秦楚者亦足以垂不朽云銘曰謂君爲良吏而君以文學鳴謂君爲文士而君以吏治稱謂君當大受而君已返于冥冥鬱鬱佳城妥君之靈人號榮名何死何生其孰云吾道之窮噫嘻其令終

兵部尙書張學顏墓誌銘

任邱劉元震

大司馬張公勳望著天下而公在汴中與家君同藩臬相善尤夙聞之及不佞登朝公游大用中外數歷所耳目公行事有年矣不可謂不知公公令子承祚等以合葬誌銘請則安得辭按狀公諱學顏字子愚別號心齋公先世爲廬州合肥人其始祖德山自合肥遷廣平肥鄉家焉六傳至公父西瀾先生應麟貳守潞安府皆以公贈封如其官母宋氏繼母陶氏皆贈封一品夫人公生有異徵宋夫人夢顏氏子請于帝大張氏門因命名及長孝友力學十六歲爲諸生高等督學使稱奇往省潞安公經黎晉屬邑無一知者曰知而以餽遺慰我受居貪名不受亦居廉名蓋自游黌校時已砥節如此識者以遠大期之丁未應歲薦己酉舉順天鄉試第三人癸丑成進士除曲沃令寬租省徭大有聲爲晉令冠值三殿災應詔陳時

務擢工料給事中卽疏奏大計謂承平久狎有驚武庫兵朽鈍不可用請除戎器備不虞出爲河南按察司僉事尋改大梁平上慙亂進遷山西布政司叅議守河東道冀甯南鄉流民作梗公威德招撫釋兵歸田菑荷絕警撫按交章薦公才可當鎖鑰進遷按察司副使潞安公訃聞奔喪哀毀廬墓側多孝感之異喪終起舊職飭蘭州兵事會遼東羽書急朝議共推公堪秉節旄迺進擢僉都御史開府鎮遼上戰守機宜十策以功進秩右副都御史再考進遷都察院右都御史兼兵部右侍郎特召公京營協理自京營拜戶部尚書每詔增額外費公必封還諫止節齎度支累鉅萬爲會計錄以進欲上知天下錢穀數且言帑藏日積宜大免天下田租報可是歲免天下賦稅數百萬改兵部尚書中開諫止內操嚴門禁失中貴人意因借危言作歌上廉知事起門禁杖作歌者縉紳中有修舊隙知上怒江陵未解乃以劾江陵戍死故御史事連公謂希江陵旨公上疏自白撫遼時翼故御史甚厚都御史某用譎構陷上怒罷之公之心大白然危甚矣昔伏波將軍奮不顧身破先零西羌平隴右降交趾老猶出雁門逐烏桓深入五谿裹革自誓功最鉅信任最篤而不能免意苴謗誣雖以之武之明猝不及察公樹勳邊圍國倚長城冒萬死宣力而瀕中橫口微公丹衷結主知天日懸昭鑒不幾爲馬伏波風哉立心正大慮事精詳故雖傾危累至不能動搖已丁陶母憂歸杜門守制服國廷舉者四竟不起惟以忠孝教子埒伏波風所著有撫遼議司農司馬奏議會計錄經史補遺張氏家訓等書嗟乎今士攘袂談天下事指掌璧畫盡無難矣其惟任事衆任

肥鄉縣志

卷四十一 藝文志

二十一

事疑爲寡斷獨任事疑爲自專事未成慮爲難首事旣成慮爲投杼故國事難任心事難白與其白心事無宵濟國事往往不能兩得談何容易歟司馬公自嘉靖癸丑進士起家縣令至登八座直聲在諫垣旬宣在藩臬勳勞在疆場德望在朝廷鞠躬盡瘁凡四十年其間萑非非一竟獨立成功功成謗解終其身聖眷不少衰非文武壯猷忠貞亮節曷以臻茲余是以歎任事之難也銘曰華胄書馨邁迹兩生臨胸潞安儲秀鍾靈司馬承之赫赫亢宗允文允武克敏克誠風波傾公公亦弗傾維主上之明維公之忠厥忠如愚深潛朗融佐邦揚烈靡爽神之錫名維借德斯儷並流鴻于九京

戶部郎中賀君恩墓誌銘

曲周劉榮嗣

公諱君恩字錫予號斗墟其先漢中之澗人公少穎異不屑與群兒曠十四試于邑輒居高等先達翕然器之居父喪貧不宿飽益攻苦問學日將以此報生我敢自逸乎凡三罹鼓盆之變日奉母親井爨夜焚膏讀書殘漏孤燈彤影相弔有人不堪其憂者每試冠諸生四方問字之履常滿戶外以公之教補博士弟子員者百四十餘人公乃收硯田代薪水朝夕展懼膝下癸卯中式爲本房冠偕計吏比上聞母病而返或謂暫留數日試事可完公曰方寸亂矣試亦不第卽第不以易病中一日養也母見公歸喜病小間曰病固竟死然以一握兒手爲快逾十月而卒公哀毀如居父喪所益感慟者養具粗備而弗能逮如窮人無所歸矣庚戌以乙榜署玉田縣教諭其教玉田士如及門受業士乙卯陞南國子監學錄其教國學

士如玉田師道立而善人多鄉國天下其義一也戊午陞南戶部司務時東西交訌徵求四出司農仰屋而嘆計畫無之且以留都庫藏爲不時之需留都司農又屢缺前後署事者調度查覈倚公如左右手先是管水兌差者爲奸人所持包收包納糧解不堪其累大譁司農慰勞撫定問所欲得接管之人則曰願必得賀公司務前無管差例以譁故使公署其事公盡革固頭買籌等弊出納以平諸軍糧解舉手加額曰從來水兌無如此楚楚也自是部中一切苦差如草場鹽政爲人所薄不欲試紛不能理者一切倚公公豁然辨之聲名籍甚辛酉山東妖賊起南薄徐州留都震動南司馬議兵北援諸軍擁馬首譟曰督糧者非賀公死且不往戶兵兩部會題公爲督糧道監諸軍事會賊平事寢八月陞本部山東司郎中九月奉勅管理北新鈔關稅司物故一時大猾乘機規利捏造揭狀投遞各衙門曰某利當興某弊當革關政以蠱司農于公選擇而使不次及公而忌公者遂欲借察典中公于公力解方已及就事稅務蕭條不當前者十之二三蓋遼左未嘗黔蜀告變加以山東妖寇爲梗淮陽以下舟楫不通久矣公益與爲寬政蠲科罰除奸宄商旅皆悅而願出于其關報滿之日除完新舊兩額外仍完前任物故者未結之局吁亦艱矣竟以此積勞殞身抑何清白自砥愛以其身爲天下不以天下愛其身也又聞公公私束修前後置田七百餘畝盡付伯兄族中不能耕以讀者多所周恤其年某友不能以父喪歸里探囊得八十金悉以予之居恒助人婚葬小者不及概錄以公起家貧屢坎軻萬狀又好自修潔不欲爲苟受宜箚中無長物而

肥鄉縣志

卷四十一 藝文 誌

二十一

樂與好施急公行義又如此此不足以盡公公可知矣銘曰學有餘爲人師白有餘涅不淄力有餘事以治世之儀國之維以開爾後之釐

藝文

傳

劉氏李氏同節傳

馮春暉撰

劉氏者明通州總鎮汝行張公之繼室國戚新樂侯之孫女也氏適公年最少公亡時甫二十八歲生子萬春方六歲氏雖貴胄勤儉謹樸不減鹿車家風會公亡有家難惡姻欺其寡孤百端媒孽視爲几上肉劉氏深閨孀婦又醇厚不識外事怯怯不能辨有無室李氏年方三十挺身控於上台終以直伸而家業幸無恙李無所出附於劉無彼此同居完節始終無間言教育萬春成立入邑庠前大名道扁旌二氏節勁松筠劉七十八歲卒李八十一歲卒里人馮春暉爲之作傳曰二氏之節有三難焉語云由儉入奢易由奢就儉難總鎮公貴宦也二氏一旦守寒素茹苦集蓼有不能堪者若固有之一難也易曰二女同居其志不相得曰睽二氏同居一意守貞相持如左右手有如葛藟之附樛木二難也二氏早年痛寡遭家多難百折不改其操撫育嗣子成立俱以令節終三難也爰合傳之以表幽貞云

肥鄉縣志

卷四十一 藝文 傳

二十二

藝文

祭文

胡盧營陣亡義勇祀武廟告祭關帝文

成仁取義遐方共仰夫威靈捍患禦災衆庶咸叨夫覆冒况捐軀而報國尤視死之如生無間幽明特申昭告胡盧營陣亡義呂諸宮等勇期赴敵志切同仇方効力於疆場旋殞身於鋒鏑天愁地慘冤固結兮難伸雨泊風漂魂歸來兮何託幸邀曠典褒忠有待於

朝端得庇慈雲祀常依于宇下從此棠梨麥飯得招渙散之游魂還期風馬雲車永護忠貞之毅魄

義勇祠祭文代

趙文濂

燕趙多悲歌之士慷慨從戎封疆思効死之臣春秋致祭率皆榮登仕版寵受軍符忠成於爲國捐軀典符乎禦災捍患未有盡殺身成仁之節氣奮闔閭竭見危致命之誠名標庠序者也惟爾附生呂諧宮等英才軼衆壯志凌霄素服習乎詩書亦相安於耕鑿文章彪炳銜華佩實之功氣象崢嶸烈日嚴霜之概往歲山東倡亂邊鄙交訐輔車連失夫重城兵鋒獨當夫一面申息之北門不敢秦晉之東道難通選仗而武庫甲稀告警而紙鳶信斷本縣支持殘局保守危城除戎器以修戈矛勸鄉民以行團練爾等義深敵愾志切同仇應募而願備爪牙受命而如使臂指拔戟以成一隊不約而同傳箭以徇三軍連村而至

肥鄉縣志

卷四十一 藝文 祭文

二十三

爰整義旅用挫凶鋒以如虎健兒當封狼醜族一鼓作氣先登麾鄭伯之旗三刻踰溝超入躍須陀之柵塵起而風雲變色礮開而烟焰漫空大旗奪而我將皆飛短兵接而殺人如草行見功成掃穴績奏擒渠矣無如右師先潰大勢難支四面重圍一軍皆墨猶復張空拳以奮戰拾折戟以衝鋒胸洞公孫腸拖賈復酒葺宏之血化碧而色已沈沈歸先軫之元如生而氣猶凜凜擒陳安而不得十盪十挾以盤矛求丑父而無從三入三出以陷陣玉門關裏我幸生還無定河邊卿猶骨曝文淵並無屍可裹馬革空存子胥縱有恨難銷鯨波未靖褒忠大典尙有待於

朝廷死難精忠每榮懷於夙夜用是修明祀典創立祠宮俎豆薦黍稷之馨節義靖兵戎之氣距冬至一百五日節屆清明設神牌七十三人筵開整肅憑帝君作阿護淒涼之旅魄應憐以武廟爲依歸渙散之精魂庶萃嗚呼執干戈以衛社稷儻可無殤作厲鬼以殺賊人死猶報

國

肥鄉縣兵死難民祭文代

趙文濂

去歲釁開東省禍慘肥鄉血化碧以長留火連村而不斷爾等或沙傷効力一戰旋殞夫兵鋒或樂土移家半途忽遭其劫奪或壯年裹脅前驅當鎗炮之衝或稚齒流離異地受飢寒之困天飛窺雪魂漂泊兮何歸地慘愁雲屍縱橫兮誰葬本縣撫膺切齒慘目傷心愧防剿之多疎憫瘡痍之普遍輕徭薄賦災黎

之撫卹維艱掩骼埋胔枯骨之收藏必謹當春光之和煦憫旅魄之伶仃爰卽清明特陳牲醴一盂麥飯野無祭兮餒而滿樹棠梨殞有宮兮渺矣馨香昭格聊擬騷招夜月之魂闔里遄歸莫爲厲作他鄉之鬼

重修竇文正公祠堂告祭文

趙文濂

崇儒重道明禮典重夫春秋立懦廉頑清德風高夫桑梓禁樵蘇于柳下季處士之壟猶存森古柏于錦官城承相之祠無恙此則神靈呵護典守攸司考故迹而煥然如新瞻遺容而肅然起敬豈有名儒憑式邱封半沒于蓬蒿故里瞻依廟貌將摧于風雨者乎恭維 漢卿先生生金之季值元之興幼備歷夫兵荒長昌明夫道學隱居不仕紹伊洛之淵源聘幣而求等莘磬之出處宣猷潛邸敷陳首重夫綱常佐運開基渾一遂同夫區宇共姚樞機參帷幄稱一代之名臣與劉因道闡天人先北方之學者擊權臣王文統公論能伸荐正學許魯齊儒風丕振史天澤望隆將相遜此文章劉秉忠廣運機謀無其醇粹以故恩承寵眷福備哀榮賜葬而冢象祁運建祠而神來昭格三十畝護墳故地祀事祇領於儒官六百年表墓豐碑遺文幸濡夫大筆無如時移勢易代遠年湮此鄉屢被夫凶荒往歲又遭夫兵火烟荒隴斷僅餘馬鬣之封日炙雨淋難壯壘飛之色墻垣頽敗廈將傾而一木難支戶牖摧殘門雖設而雙扉莫掩工不可緩行路者且過而傷心責有攸歸備官者敢視同隔膜平濂博稽史冊臨文每企夫高風忝竊微官司鐸幸依夫故國抵任在九秋之杪倉皇之戎馬臨城致祭在二月初美富之宮墻墜地爰捐清俸敬飭儒

肥鄉縣志

卷四十一

藝文 祭文

二十四

生代任監修重啓祠宇補偏救弊肅竹苞松茂之觀舍舊圖新異刻梅丹楹之制經營而不皇告萃輪奐而不日告成穀且爰諏神牌恭設禮同釋菜蘋蘩蘊藻以明虔曲奏迎神文物衣冠以肅拜取之不盡用之不竭祀田之餘粟能供高其閭閻厚其墻垣故廟之舊觀頓復庶幾通微合漠神來而得所憑依還期奮武揆文士習而咸知變化

各村遇害紳民入祀昭忠祠祭文

趙文濂

維同治二年十二月十五日主祭官陞署廣平府知府肥鄉縣知縣楊 致祭於入祀昭忠祠各村遇害紳民之神位前曰慨自禍機早伏殺運將開隣省既見其繹騷內地復因之勾結蜂屯蟻聚方歃血以定盟豕突狼奔遂樹旗以舉事爾等或偵探賊信而忽殞凶鋒或督辦鄉團而頓遭慘害或挺身以罵舌雖斷而血可噴人或接戰而亡肢已分而屍猶投火或搜求騾馬索未得而挺刃相尋或看守田廬避未能而操戈相向天如此醉人則何辜當胸洞而腸屠寔心傷而目慘二三年兵連禍結慨受害之有由六百人義取仁成知返躬之無憾不甘心以從賊卽爲

國以捐軀無忝忠貞宜隆饗祀本縣意存彰善祠建昭忠衆團丁慷慨捐生諸練長從容就義莫不據情申請

朝廷下賚夫

恩綸逾格

褒揚春秋特崇夫廟食爾等忠魂激烈旅魄飄零名已重於千秋事宜歸於一律爰諏吉日洞啟祠堂當牲體之羅陳庶精靈之陟降嗚呼易言格廟合享萃渙散之神騷擬招魂厲節體

褒崇之意
山東堂邑縣甘家屯打仗
陣亡前官練勇人
祀昭忠祠祭文

同治二年十二月十五日主祭官陞署廣平府知府肥鄉縣知縣楊致祭人祀昭忠祠陣亡哨官耿德芳夏進德張金銘及諸練勇之神位前曰勇期殺賊義取捐生苟昭果毅無忝忠貞特隆饗祀聊表衷情咨爾耿夏爽露英英左右侍我竭智輸誠敬能將事材可干城去歲寇亂遺孽潛萌干戈擾攘聲勢縱橫爰練勁卒以備長征選爾領隊秣馬礪兵倏聞警報邊鄙皆驚傷亡練長潰散團丁一軍皆墨大厦將傾喜爾機警克振軍聲戟揮紫電劍拭青萍塵飛日蔽礮震雷轟西賢店外一戰功成今年正月許請長纓爰隨道憲以討不庭戰香城固守善樂營洪流馬騫畫鼓雷鳴發無不中勝孰能爭更隨藩憲戴月披星御軍能整按轡無停縣抵宵晉丕振聲靈先登陷陣鋒莫敢撓爾蒙賞識我亦光榮迄乎三月隨我戎輶整齊隊伍拱聽使令操演陣法務迪專精退嫺步伐進整弓旌收降奏凱指日澄清豈期宋逆傲慢驕盈

肥鄉縣志

卷四十一 藝文 祭文 二十五

甘心背叛矢願兼并制軍震怒威厲雷霆滅期一鼓令下三更卒簡勁旅刀發新礪旗旄赫赫燈火熒熒兵分八隊捧海澆螢田禾正茂霖雨方零炎炎天氣渺渺郵程三軍暫駐一騎前偵欲探消息再決輸贏前軍忽敗後隊方迎勢如山倒手莫天擎爾衝陣入生死皆輕風塵暗暗烟霧冥冥殺聲慘切礮響訇訇捐軀爲

國金鐵錚錚更可惜者張子金銘技嫺弓馬聲振庠豐誠竭丹悃賞錫藍領頭銜進秩羽箭馳名館陶隨我患難同經陣當迸散賊甚猙獰以死衛我獨力支撐此心可白有目難瞑更嗟練勇爾本鄉氓因從軍旅暫舍鋤耕誓吞蛇豕欲戮鯨鯨楚氛甚惡趙卒同隄魂飛月黑氣撼天青迄今凱撤我返公廳妖魔小醜咸靖郊垌著名要犯悉正典型

天誅已伏爾憤差平昭忠祠建畫棟雕甍紛陳酒醴敬展牢牲禮成一獻奠設兩楹迎神之曲鼓瑟吹笙栖神之所繪像圖形幽明不隔俎豆維馨疇昔之夜入夢形呈音容慘淡肢體伶仃守城氣奮爾念猶惺哀死語慟我夢微醒魂來渺渺心動怛怛還請

郵典申奏

朝廷

藝文

詩

浮萍

有草生碧池無根綠水上脆弱惡風波危微苦驚浪

馮元興

知縣鄒理

瑟瑟西風古渡頭凄然芳草幾經秋鷗飛斷岸天將暝日落寒江水自流十里烟霞迷望眼萬家枯杵隔滄洲遊人莫謾生新恨今古無窮宋玉愁

天臺晚眺

喬年

層巒疊障聳晴空匹馬西來第一峯滿目烟霞春雨後萬山蒼翠夕陽中鐘聲撞破樓頭月花氣飄殘檻外風尋僧更訪山腰寺半醉題詩峭壁東

漳水春遊

蔣良寶

花柳漫郊弄曉晴春光入眼正分明溪頭小酌唵邊趣馬上停杯物外情野寺何人橫短笛東風幾處聽啼鶯夕陽回首城南路更喜民謠頌太平

登蓬萊閣

郭璽

肥鄉縣志

卷四十一

藝文詩

二十六

池上何年有此亭我來真得瞰方瀛洞中仙酒蛟龍釀雲裏玉簫鸞鳳鳴日近始知城不夜風迴惟喜雪初晴白鷗作伴閑眠久贏得人間吏隱名

登岳陽樓觀洞庭湖

郭崇嗣

歲晏驅車過岳陽危欄回首鬱蒼蒼洞庭水闊商帆集楚岫雲開雁字長泣竹千年逢二女懷沙何處吊三湘蕭蕭風葦江流急落日登樓悲未央

天門巖

李枝秀

突兀危峯起崎嶇狹路通石標千古色虎嘯滿林風看篆懷明德談禪憶智聰買山錢不用未可嘆塗窮春日卜居

杜國華

世情無底極卜築且皋居小茨隨簷短長筇任杖徐柳吹春竈火花發夜園蔬客至無別供床頭數卷書新社日看將至梁間燕子鳴戀花添舞蝶拂柳間流鶯未遂新巢願頻傷故壘情幽棲飛未定何以異吾生

杜國華

寒食

風雨臨寒食偏驚流浪情梅花香信遠芳章客愁生青眼故人少白頭世事輕還餘一樽酒東海吊田橫

山中曲

呂元聲

萬嶺雲屯古木蒼千尋瀑布瀉秋光山家不解

味共道崗南野菜香

瑞峯庵和韻

張懋忠

清切龍盤地連山集百靈小村紆氣紫孤嶂插空青入峽形疑束排林意暗停一庵留半榻片硯勒貞銘
西邁虹將駕南瞻翠敞屏猗猗逢怒石惆悵別危亭終藉津梁返君聽澗水冷

漳河渡

張善教

登途舒眺望石路野田穿風軟松遮徑波輕客下船閒雲常帶雨晴日亦拖烟貪賞東山寺舟人倚醉眠

古渡秋風

李逋

野水涼風吹蓼花晚烟帶濕似朝霞月明渡口漁歌亂雲起船頭帆影斜秋老方知宋玉苦詩興只看杜
陵賒世問舟子通鷗意蘋白渚清落雁沙

宛懷草堂招飲

李愷

同人且永日選勝此焉過頓訝塵容失還欣物象多臺山留昔秀漳水送遙波一望悠然臨風發嘯歌

漳水

賀應旌

烟籠柳岸水盈盈徙依城隈百感縈一色長天排浪影千尋斷港起波聲園饒淇竹悲何策畧隕蒼華痛
我生只有蛙鳴無箇事公私不管到天明

肥鄉縣志

卷四十一 藝文 詩

二十七

晚投山寺

張繹

策馬投荒寺輕陰散晚風嵐光噴月小漁火點波紅雁陣空冥裏村烟斷續中不知山路險乘興訪支公

大雪

張祖岱

冰結銀爲桂花飛玉作林半青微吐栢純白不分岑路引尋梅興樓成和雪吟烹茶吾自掃不效黨家斟

輓路氏娣姒以兵亂投河死

李貞吉

眞卿及杲卿兄弟兩忠節髮膚豈不愛所爭在帝轍我舌及我身丸丸地上血志與松筠堅不隨秋草折
天台有蕙蘭奕世乃齊烈于莽驚伏戎珠玉同沉滅多少巾幗流一門著雙絕嗟彼鬚眉人朝秦復暮楚
勞勞空自拙

寶塚弦歌

賀文瑤

公爲萬古植綱常髣髴衣冠遊北邙鴻名已留金石永血食猶聞俎豆香孔門弟子先生志寶塚師資百
代芳弦誦不離悲歌調忻看吾道在衡漳

過天台山市有感

程學禮

天台山勢半蹉跎三十年來感慨過往蹟誰知傅趙勝里名已自失荆軻隨他市語悲歌散且傾村酒醉
顏醜陵谷不堪回首處日暮獨上古城坡

新築文靖公墓成

李宗桂

風度端凝古大臣如今壘墓又重新荒地此日無丞相舊國當年有聖人時事暫隨棋局變勳名常載史書真請看碑碣巍然處淑氣仍留萬古春

重築李文靖公墓

焦利生

文靖遺邱幾代淪一朝修舉又鮮新封壘不沒通明相崇祀還瞻柱石臣風度當年天子貴清標此日聖人真卿雲布護千秋影碣石昭回萬古春

謁李文靖公墓

教諭柴士珍

生平勲業史編留身後猶存土一邱風度早徵公輔器推崇曾擬聖人儔壘封華表憐歸鶴雲護佳城認臥牛歷代褒嘉恩澤洽萬年俎豆薦春秋

留別肥邑士民三十首錄十五首

知縣萬永福

三年肥宰竟何功辜負君民愧撫衷惟有焚香祝靜夜昇平歲歲慶魚豐
乘堂無事倩雲封獨喜多賢伴烏蹤此後足音空外聽不堪回首望山重
四民安分得安居俚說休忘數紙書此理此心人共具看看赤子見生初刊勸民俚說村給數本
額外窮民幾向隅三旬斗粟抵囊珠於今每飯猶塵念冷落炊烟起也無額外窮民月給斗米捐金生息詳明各憲永遠遵行

肥鄉縣志

卷四十一 藝文 詩

二十八

未得牛刀濫割雞罔民多少不勝悽願民常念枷時苦勸語聲聲淚下齊

說去依然夢裏人北來空現宰官身浮雲幻盡天花落雨雨風風不盡春

見說還家萬里雲爭來矚餽意殷勤清漳舊是平原跡慷慨人人繡此君城南有平原君墓

風塵幾許叩禪關法雨如珠願未還待結菩提成善果異香天外想芝顏大佛寺祈雨寺梁曾產金色芝一本香聞數里

紙帳蕭然帶雪眠清遊竹外與梅邊醒來不訝寒侵骨道路人多是薄綿

不是鹽梅那可調菜羹還說舊篔簹前賢未入紅塵夢愧我黃梁夢浪消

丞相墳頭滿目蒿當年事業足英豪談心節愛猶云愧何況區區如我曹李文靖公墓西門內

正學敷陳不厭多太師清望竟如何風流莫道隨漳改認取心源濯素波資文正默本縣人

比歲歡呼免癸庚皇恩帝德厚民生願民永念天家賜順則常教順氣成

勒馬台前步禱曾雲雷一夜汗駒騰祈公舊雨年年惠不負經綸萬古稱相傳勒馬台是李衛公行雨處予祈雨掛匾曰雷雨經綸

風塵鹿鹿自題凡解組還披舊日衫借問冥鴻何處集麒麟山下老松杉子鄉名瑞麟鄉在麒麟山下

贈清漳明府姪聿自全集採入

唐李白

我李百萬葉柯條布中州天開青雲器日爲蒼生憂小邑且割雞大刀佇烹牛雷聲動四境惠與清漳流
弦歌詠唐堯脫落隱簪組心和得天真風俗猶太古牛羊散阡陌夜寢不扃戶問此何以然賢人宰吾土

舉邑樹桃李垂陰亦流芬河堤繞綠水桑柘連青雲趙女不治容提籠書成羣纒絲鳴機杼百里聲相聞
訟息鳥下增高臥披道帙蒲鞭挂簷枝示耻無撲扶琴清月當戶人寂風入室長嘯無一言陶然上皇逸
白玉壺冰水壺中見底清清光洞毫髮皎潔照羣情趙北美佳政燕南播高明過客覽行謠因之頌德聲
十四日抵肥鄉成豐辛酉九月

趙文濂

僻縣抵肥鄉連年苦旱蝗閭閻安撲拙市井慨淒涼文廟宮牆峻官衙蔓草荒華堂聊寄寓日色已昏黃
十八日接印聞警

纒縮儒官綬征車暫息勞未遑宣教化倏欲整弓刀旌旆旋威縣勝京保烽烟達館陶書生無將略東望首
頻搔

二十日金鏡軒太守廣平縣防堵統兵過境

東路軍書急南轅太守行鳴騶排小隊合郡倚長城烽火連天暗旌旗夾道迎營門趨謁處侃侃夜談兵

戍刻接札督辦團練

夜深飛札督鄉團火急軍符秉燭看戰守城宜成衆志指麾權竟屬儒官兵非訓練談何易材本迂疎試

始難越境更申防剿令裹糧坐甲集河干王蔭堂觀察調鄉團防守運河

李文靖公墓

肥鄉縣志

卷四十一 藝文 詩

二十九

宋代論賢相誰如社稷臣端凝儲偉度浮薄斥宵人焚詔宮闈正封書水旱陳高風師百世親炙苦無因
梓里來司鐸城隅墓道尋烝嘗昭代祀修築後人心宿草碑苔沒衡漳水莫沈墓曾爲漳水沈沒英靈如可接烟景

鬱森森

二十七日兵氣漸遠舊店撤防

東來群盜大縱橫犄角防維勢已成岸據洪河方扼險變生內變忽焚營巢回濮范匆匆去隊整弓刀緩
緩行何日烽烟銷萬里溥天齊唱凱歌聲

濬濠篇爲楊樹屏明府作

崇墉屹屹孤城高城隍詰曲圍周遭金城湯池資保障河身淤墊難容刀風塵四起兵鋒逼無險可扼心
切切樹屏明府計深遠城垣修築挑城濠勞逸適均丈尺計畚鍤畢具塗泥撈來往督工意勤懇竭蹶從
事聲喧囂壅去流沙涯岸露滋除蔓草荼蓼蕪車運溪邊反藁裡繩懸澗底轉桔槔闕地及泉水清淺成
山積土隄堅牢濠寬三丈深丈五投鞭孰斷流滔滔牛馬牆高濠內築弗勝鼙鼓聲聞馨萬衆羣集與厥
役六日工畢忘其勞爲民禦災兼捍患不同土國嗟城漕溪流襟帶環雉堞密布火器排旌旄鑿斯池也
與民守志願堅定才賢豪摩岬勒碑紀巔末濠梁題柱濡吟毫

贈張生夢星

短衣匹馬敢從戎，勳在諸軍戰敗中。獨力摧鋒山莫撼，奇兵制服火能攻。執戈枉費前驅力，奏績誰論後拒功。我賦新詩聊紀實，不教忠義沒英雄。

贈郭生慶雲

胡盧營外陣雲昏，慷慨從軍報國恩。陷銳鋒摧兵奮氣，裹瘡血戰劍留痕。事關忠義生曾舍，身歷艱危命幸存。効力戎行功莫叙，此心耿耿與誰論。

守城紀事

剛說衝威縣旋聞逼，曲周原難防燎火。河莫隔洪流，兵勇傷亡盡。風烟慘淡愁裹瘡，能力戰膽略有誰伴。

曲周分
余承恩

天色甫黎明，鄉民盡入城。開門容避難，防患共操兵。嚴密稽宵小，從容靖物情。倉皇奔赴者，街巷已皆盈。城角擒姦細，衙齋見縣尊。緝人宵入郭，舉火夜開門。謫詭幾先燭，防維事共論。三更傳號令，鎮靜寂無言。烟火高騰處，旌旗密布時。難民猶未入，游騎已交馳。堅坐人心靖，開門定力持。兵機宜整暇，此意有誰知。內應先機斷，危城徹夜防。火光三面熾，月色一丸涼。挾纜人心慰，揮戈士氣揚。來攻期昧爽，謬說斥荒唐。寇逼城雖閉，門猶日數開。路通樵汲便，今下雨風催。嚴陣防衝突，宜民任往來。矯情聊鎮物，欲入故遲回。游騎來東道，前鋒逼北關。戎嚴方隊整，返旆忽轅還。車馬奔馳處，烟塵指顧間。西南翹首望，殺氣莽迴環。

肥鄉縣志

卷四十一 藝文 詩

三十

仙令方樓疾，居民盡上城。撫循安壯士，護衛有門生。

生員喬日章史肇
榮執械護我巡城

號火風中燭，援軍月下營。逃人奔告處，銳氣鼓怦怦。

遍野雪飛英，乘虛欲撲營。寡原難敵衆，敗即可攻城。拉雜軍先潰，倉皇衆必驚。力持堅守議，桴鼓不需鳴。

剿賊方收令，援軍忽扣門。啟關城共入，鏖戰事重論。兩箭千枝急，風鬃萬馬奔。迎頭兇截好，一霎陣雲昏。

城北來馳報，城隅兩陣攻。乘堙風凜凜，觀戰雪濛濛。蓋地旌旗白。

賊中軍
皆白旗

轟天礮火紅，壯觀從壁上。拭目

奏奇功

誘敵方收隊，衝鋒忽合圍。征塵騰慘淡，火器震聲威。制勝紅旗閃。

副將黃有
馬上紅旗

催軍白羽揮，追奔風雨驟。我

將盡如飛，賊已聞風遁。城猶徹夜巡，官營明有火。月宇淨無塵，事後防閑切。宵深號令申，勤勞憐我老。厚

誼感鄉民

脅從能爲力，生還解復讐。裝鎗無火藥，臨陣棄戈矛。鋒鏑拚逃死，權宜暗運謀。潰圍難出者，屍骨付誰收。逸賊村村執，逃人處處擒。鋤姦持重法，訊馘竭虛心。誅賞羣情貼，哀矜雅意深。鄉民知大義，餘孽共搜尋。僥倖逃新死，艱難返故居。干戈連戰伐，闔里慨邱墟。力竭兵銷後，房存火蕪餘。撫摩慚寡術，相對意唏噓。

贈史生肇榮

科甲聯芳弟，繼兄旂常鐘鼎舊。家聲翩翩濁世佳，公子武烈文謨見性情。

父聯成辰武進士
叔鶴甲戌武榜魁

烽火烟塵勢接天暫拋筆墨執戈鋌儒官護衛無兵甲城守惟借弟子員
寒夜巡城不憚勞感君伴我月輪高始知作賦凌雲者陣掃千軍筆似刀

贈喬生日章

岌岌危城徹夜巡寒宵誰護苦吟身豈知絳帳傳經者受執前驅大有人
雪天觀戰北城門勝敗機宜話共論遙指陣雲愁慘處家鄉不遠是前村 生西落堡人
遲遲鐘鼓五更長戰勝猶然未撤防一樣心兵同鬪處半論攻戰半文章

明兵部尚書張學顏墓

一杯黃土俯孤村宿草迷離繞墓門斷礎僅餘殘柱在英風猶說夏官存龍韜望重功垂史虎榜花探澤
衍孫武烈文謨消歇盡盛衰轉瞬最銷魂

漳河故道

清濁漳交流昔聞在城外由此達曲周溢陽河同會風雨吼波濤沙石激湍瀨作勢繞垣墉引流入溝澮
杭稻灌有資蒲魚利攸賴浩渺無津涯陸沈罹災害舉城付波臣禍患斯爲最舊店暫徙居時勢出無奈
迄乎城重修奠居卜著蔡舊治復移回巨浸資襟帶今徙入衛河濟運勢霽霏百餘年於茲災黎免顛沛
然而險要無隱憂貽方大去歲亂交訂鼓行贍動旌荐食逞豕蛇進退成狼狽城守幸無虞後患憂未艾

肥鄉縣志

卷四十一 藝文 詩

三十一

儻有險司憑臨流樹旆旆半渡摧其鋒血漂波汪穢漢廣可爲池門高孰投蓋險旣扼山谿計難肆狡獪
我來訪故渠歷歷形如繪斷岸連坡坳蔓草滋蔚蒼險要失金湯烽烟動塵壙何當挽洪流洗兵常清泰
團練大閱呈楊樹屏

思患宜預防宜民貴通變增兵勢未能募兵利未便斟酌於其間莫如講團練神君籍湘南文章霞彩絢
力學裕經綸禦災備征繕完守力有餘決幾才洞見講武農隙時法立皆稱善地無論城關人無分貴賤
三時務老農六曹備良掾服賈貿易人搗華詩書彥各執綠沈槍兼發白羽箭火器震聲威攻取利尤擅
因時制權宜計日期周徧本業各無妨人人皆歡忭口糧復無需家家供飲饌簡易期通行久遠欲無倦
爰於合操時大閱分最殿戒嚴畫鼓傳麾軍紅旗顛排隊立沙場鳴騶出花縣令頒兵氣揚陣演刀光炫
火礮佛郎機驟發如雷電火銃與神機光迸目睛眩彎弓耦各分破的人爭羨技藝果優爛褒賞荷寵眷
鼓舞意拳拳誘掖情戀戀慷慨切同仇感奮咸革面團練法旣行兵鋒靖芳甸常可保身家變可備攻戰
倘非遇神君盜難清內線我來備儒官沾沾事筆硯獻策悉敷陳守城蒙推薦好我慰私衷閱兵與公宴
肄武衆整齊作詩字研鍊非侈頌禱辭歌謠同野諺

竇文正公祠墓

一代儒風倡無如竇漢卿程朱新衍緒姚許舊齊名苦口論權倖甘心答聖明薦賢原爲國豈獨故人情

故里儒官忝孤村斷壘荒特來修祀典親得至祠堂舊廟摧風雨豐碑峙夕陽重修期後日私願或能償
清明節致祭義勇祠卽日甘霖沃沛呈楊樹屏

祀典春秋重神君節義彰作霖敷愷澤啟宇闢祠堂前歲兵鋒起連村火烈揚重城看瓦解巖邑慨唇亡
過境三軍去衝途一面當壯猷資里閭忠憤激膠庠筆墨風雲氣擾鋤日月光箭傳遵將令隊整飭戎行
旗纛狼頭建車徒馬首望綏交地短劍刃接奮長槍勁弩更番射神機兩翼張喉春戈返日耳貫矢穿楊
大陣盤鵝鸞妖氛靖虎狼石師先潰散賊勢遂披猖四面重圍合千軍奮力剛礮猶施火器戟已折沙場
鮮酒畏宏血枯拖賈復腸歸元悲愆絕捫足諱胸傷冤雪天飛白愁雲地覆黃並無屍可裹空有願難償
褒獎時猶待衷懷今不忘清明新物候俎豆薦馨香旅魄憐漂泊精魂索渺茫明禋升黍稷新廟集冠裳
珍重鵠三奠唏噓泣數行神君心懇懇天意喜洋洋慘霧消中夜甘霖沛上蒼輿情舒抑鬱樂歲兆豐穰
創建孚民願忠貞慰國憂神人胥悅處感格豈尋常

四街鑿井盡得甘泉呈楊樹屏

共守危城號令從芻糧雖積水難供綢繆未雨精誠格掘井何勞拜耿恭
自是神君雅化宣能教斥鹵變甘泉城中從此居爭卜廉讓之間范栢年
井底波瀾不起時一泓澄澈此心期使君詩思清如許酌水無須勵隱之

肥鄉縣志

卷四十一 藝文 詩

三十一

井冽清如在玉壺餘甘波及到吾徒石泉槐火新時賦欲乞東坡調水符

偕劉光陸訪平原君墓

涼風颯然微雨住驅車共訪城南路琳宮梵宇峙芳郊剩水殘山環古墓巖巖豐碑樹墓門

萬歷壬辰張懋忠立碑

銀鈎鐵畫破苔痕石紋剝落字迹蝕遺銘猶題趙平原祠宮洞啟瞻遺像顧盼生姿精神爽冕旒秀發飭
威儀旌旆飛揚肅景仰祠後殷勤古墓尋祁連高塚鬱森森高低禾黍青浮野遠近楸梧綠滿林此距邯
鄲六十里故都雄勝山河美自封肥義始名鄉地僻偏隅乃葬此細將名勝考輿圖故趙山河片土無葛
藥孤城半湮沒列人故迹久荒蕪遺墟蒼莽殘疆擁死土生王無舊隴興亡歷歷數千年一坏猶存公子
塚公子好士動諸侯邵秦存趙功無儔毛遂李同奮智勇史冊焜燿傳千秋功成而退頗知足嫌疑善避
忠貞篤全身遠勝信陵君婦人醇酒遐齡促飾終茂典備哀榮輔相三王有令名炤閃晷燈闕幽室風嘶
馬石啟佳城迄今高峙佳村外山流雄勝猶襟帶邯鄲來往精魂通阿護神靈利永賴我與名流引興長
尋幽訪古共攀裳泰山神祠創墓側誰說墳頭坐女郎

新修魁星樓落成

魁柄形如斗星文象戴筐霖曾爲傳說言又啟文昌際會風雲氣樓臺日月光城邊翹首望倬漢炳天章
地勢占方向儒風振使君止戈方優武興學復修文保障城新築絃歌化共聞彤家言可驗持建閣凌雲

一自樓移後人文鬱有年兵戈連戰伐科第鮮聯翩舍舊機能轉為良地可遷俯從多士願誰識妙微權勢與新城接工從舊地興文星丹闕耀傑閣紫霄凌風會荒重破雲梯路可登願攜門下士直上最高層

重修寶文正公祠墓

森森古柏錦官城丞相祠堂舊有名獨在故鄉留廟貌高風誰得似先生

碑文王盤奉勅撰盤永年人

故塚猶存馬鬣封沙環水繞護重重大書深刻豐碑峙石骨嶙峋墨色濃
時移世易水山殘子姓無存奉祀難剩而墓田三十畝春秋祭典領儒官
連年兵燹苦頻仍戎馬縱橫礮火騰村墅荒涼祠僅在支持風雨力難勝
松楸蔭樹綠陰敷皮剝無存葉已枯柳下空留賢士壠有誰下令禁樵蘇
祀典修明展仲春衣冠整肅醴牲陳神牌失去墻垣圯滿志躊躇為愴神
特捐清俸亟經營塗墍垣墉不日成復向邱封增式廓祁連高塚鬱崢嶸
敬誦吉日妥神來俎豆馨香棟宇開差勝前賢李文靖祠堂書院委高萊
重道崇儒觀察賢紹源伊洛榜高懸雲烟重整龍蛇字此舉依稀百二年
江水雲山景最奇釣臺曾記子陵祠如椽愧乏希文筆山水高長寄遠思

楊樹屏率勇巡邊兼赴平固店與廣平曲周會哨

肥鄉縣志

卷四十一 藝文 詩

三十三

餘孽聞風動訛言到處驚伐謀乘未定防患遏將萌飛檄朝傳令吹笳夜點兵從征三百騎都聽鼓鼙聲
整隊朝鳴礮過行曉奏笳陣嚴山莫撼令肅衆無譁策馬迎紅旭揮刀炫紫霞豈惟消反側沿路閱桑麻
境為巡邊出盟因會哨尋風雲旗影合霹靂鼓聲沈良莠從容辨渠魅慎重擒恩威兼用處三屬靖人心
營自沿邊駐兵從半夜歸烽烟消氣焰金鼓壯聲威明月雙旌引征塵一騎飛聞風俱遠遁何用合重圍
閏八月二十三日積善村鄉團拿獲邯鄲逆首王守清從賊馬永善二十八日又擊獲王守清之子

王誠馬永善之弟馬永言

僭號稱尊衆若狂尅期舉事迹昭章兵猶未集機先露兆現黃龍涉渺茫

王守清屢有黃龍出現之兆教匪信服之約閏八月十九日舉事先期破案

滅迹潛逃不可求誰知黨又訪同謀生擒天子非難事羅網匆匆竟自投

失察兇渠受禍深搜求戮力正同心喜春皇帝微行至李代桃僵竟就擒

帝二磨勾結王守清起事破案逃逸勒限嚴擊王守清號喜春皇常

魚網鴻雁事已奇天心更欲聚殲之試看孽子潛來日伏法三朝尙不知

王守清馬永善解赴大名二十六日伏法王成等不知也仍赴村訪常二磨相

獲繼破

紀事

五十有三人投誠氣未馴方期洗兵馬忽報警風塵突騎擊衝陣前鋒近逼隣整軍馳赴處邊境以時巡

冠縣賊匪錫珠等五十二人既降復叛沿途襲脅賊勢遂盛十月二十三日突至廣平縣平固店肥鄉肅楊竹坡外委帶大隊至東章堡防剿

飛札調鄉團兵行力恐單誓師傳語切整隊撼軍難戈戟連村接旌旗遍野看聲威先震處賊膽望風寒

楊樹屏明府帶鄉團數千人由崔家庄至北高舊店巡邊晚至東章駐營賊聞風驚遁不敢入境向曲周縣安爾寨等村逸去

西郊大閱

大閱聞仲冬况當寇觀翼羽檄正交馳聲威宜先振爰於縣西效操演五花陣日暖惠風和雪晴沃土潤講武整三軍鳴騶馭八駿旌旆展霞標戈矛森雪刃始焉一字徘徊容神靜鎮少焉鼓角嚴部伍以次進箕張翼宛舒魚貫序亦順俄焉花亂飛風靈齊奮迅鳥機礮開山驟發如雷震火銃連環開烟焰飛紅燼長槍後護之步代互相認進退變從心方圓驚轉瞬攻堅氣飛揚守隘地險峻圖從八陣開名與六花襯大旗周回呼收隊咸敬慎令出衆無譁師誓言必信有勇敢凶殘知方昂忠蓋律失罰必嚴賞行財不吝禦寇修甲兵詰戎拔英傑一掃靖妖氛旌功茂秩晉

趙相國肥義

幼主能扶亦有功分封采邑主恩隆衡漳襟帶山河固苟息忠貞際遇同骨肉操戈王室亂死生爲國古人風君臣駢首歸於盡惆悵沙邱昔日宮

肥鄉縣志

卷四十一 藝文 詩

三十四

晉縣令張載

肥鄉改縣溯黃初九品官人令始除考古無徵多缺略以儒爲吏豈迂疎職官名可芸編冠肥鄉有令自公始前無考文字銘曾劍閣書高日時艱歸隱好純醴鄉味意何如

晉程嬰匿趙孤處也今訛爲城南堡

叢祠傾圮委荒烟憑眺遺墟意慨然避難幸居山以外得名翻在縣之前趙武靈王封肥義始名肥鄉魏黃初時始名縣尙思成信

封侯日宋真宗時封成信侯空憶邯鄲建國年歷歷興亡彈指過忠魂猶得祀鄉賢鄉賢位第一

弔鄉團陣亡生員

觀察陣亡師徒敗秦道憲奉三十一月初九日陣亡如火燎原勢崩壞尖塚渡河愈鴟張十三日前鋒倏抵房見寨二十七日于

家寨裏報安營邊馬紛馳掠廣平二十日距縣東南四五里明朝決定撲孤城草檄飛書夜起稿鄉團調赴

河頭堡復調各團互救援嚴守村坊衆入保賊鋒逼近騎交馳二十日步不敵馬力難支飛騰烟火延燒處

颯爽英姿酣戰時劉氏弟昆才競爽武生劉玉玲劉玉璋劉玉璫劉玉珠棣萼聯芳最勇往復偕小阮抗凶鋒武生劉慶龍爲國捐

軀志慷慨張生才調藐寡儔附生張學曾挺身決戰能依劉肢體已從刀下解屍骸復向火中投侯家昆弟尤

驍勇武烈文謨起接踵自帥孤軍來救援中途賊至如蜂擁怒馬前驅堅陣衝箭能貫耳鉞交胸連斃二

人全勢挫潰圍力得透重重武生侯世奇蛇豕橫衝截在後陷銳摧堅兩時久矢盡援絕張空拳血肉橫飛死

不朽武生侯世勳亂箭齊射亂刀攢剖腹挽心見肺肝屍焚野火朝烟黑血染沙場夜月寒偉八更有程榮

愷糾合鄉團嚴陣待力摧狂寇勇難當身陷重圍死靡悔同心幸遇魏青雲合兵一處抗全軍中傷墜馬

元先喪挺刃尋讐志愈殷刀傷三處頭未斷後心槍復前心貫雙睛挽去眼全無一手存時身僅半帶傷

奔至事徐陳逃出團丁僅九人効節全忠由學校禦災捍患為鄉隣我聞此事雄心激如此英才殞鋒鏑

申文一紙報文星九重轉達恩綸錫陣亡前有呂諧宮後先輝映事相同大員擁兵甘縱寇効死翻在

庠序中

楊竹坡外委敗賊西賢店

烟塵四起距縣東偏師直搗推英雄光騰才戟朝霜白旆閃旌旗曉日紅東章堡乃扼要地偏師駐此嚴
為備夜深一紙接軍書運籌決策從容議三更飛札調鄉團為守危城留縣官游騎交馳防寇逼偏師回
救恐兵單偏師未返敗書至倉皇為我言其事河頭堡與屯庄營團長團丁俱殉義衆情惶駭門欲關力
排羣議令如山難民俱得城中人潰勇都從橋外環北路旌旆紛無數西張寨團來救護逐村點入怨藏
竊門禁森嚴日云暮燈後登堞縱目觀燭天烽火報平安一騎紅塵扣門報偏師制勝盡騰歡二更師旋
歌奏凱旌旆飛揚騰異彩成功迅速賀將軍酣戰情形告僚衆回兵數里遇妖氛豕突狼奔犯我軍陣法
精嚴豈莫撼士心整暇力難分大衆借來風雲變數千驍騎圍三面赴援止有北高團一隊合成決死戰

肥鄉縣志

卷四十一 藝文 詩

三十五

矢穿七札貫層層迭進連環礮火騰臥槍開處屍枕藉冒烟伏地進何能開山繳打一二里子貫數人人
馬死督隊賊日中槍亡棄甲拋戈奔不止徐徐撤隊整弓刀士卒俱未損毫毛夜可回城奇計秘少能擊
衆戰功高衆皆大悅奇功賀三百餘人強敵破運籌決策我何能敢勞曠拜蓮化座樹屏竹坡皆免冠稽首謝我致道陣法及一切調度
之事畢乘關守禦嚴連宵巡警敢遲淹妖星退舍兵氛靖壯士磨刀勇氣添才略權奇計深穩力挫凶鋒
衆無損詰朝烟火起前村聞風賊已潛師遁

十二月戰守紀實

烽火接天高鄉民難共逃扶持借老幼護衛整弓刀路遠魂難定時危首漫搔那堪風雪夜兒女聽啼號
雪霽上朝噉千車郭外屯摧鋒來北道分路啟南門稽察防姦細安全慰旅魂入城猶未畢慘淡陣雲昏
笳鼓響沈沈前村寇已深登陴防內患出隊慰人心焰覺烟塵熄渠看壯士擒望風奔潰處喜報捷書音
秘議見相同潛師欲夜攻吹笳殘月白環甲曉燈紅戈戟霜明裏旌旗電閃中危城需坐鎮扣馬阻從戎
樹屏欲出隊力阻其行

寇已入邯鄲人情得少安旋師鋒莫遏決戰力能殫焦家團練師徒敗奔馳道路難西南遙望處烟火黯
漫漫

寇警駭傳聞馳援夜整軍師行驟雷雨氣奮壯風雲雅意思借作深情等救焚前鋒猶未接敵騎敗紛紛

劉光陸欲領鄉團出隊與樹屏力勸始止

轉戰戮鯨鯨先聲震鼓聲赴援勞跋涉屬望慰雲霓落照塵俱暗悲風馬共嘶臨危能決勝偉績太常題

余蔭軒太守

一戰喜功成村墟又苦兵嶮帷方息轍節鉞忽臨城大名鎮伊綿額慟哭求征剿樹屏哭求鎮台出師迂途赴廣平遷延甘

縱寇何日覩澄清

秘約切同仇師行道不留整軍聯臂指贈礮萬權謀事以和衷濟心原勁敵求成安馳救處賊已入中州

樹屏與蔭軒合兵追賊至成安賊向河南臨漳縣逸去

游騎抵荆科鷓張喚奈何馳書邀太守整旅荷雕戈半夜箋回鴈凌晨鼓奏鼉西韓師會處拭目戰功多

樹屏與蔭軒會師西韓賊遁去

合力敵摧強兵來焰又張謙侍衛及革員王恩第喧譁聲震怒搶掠勢猖狂正論登城責樹屏正言責謙侍衛凶威斂隊藏可憐

烽火後遷徙復倉黃

團練調清豐羣來馬步同民剛經亂後市况罷年終錢米殷勤借資糧搶掠空是誰為此策遺患復無窮

防守紀實同治癸亥正月

無地止干戈兵氛可若何沙蟲軍化慘風鶴警聞訛寇恐乘虛入人憐避難多倉皇奔告者寨已逼西河

肥鄉縣志

卷四十一 藝文 詩

三十六

平固店回兵侯村夜駐營飛揚騰殺氣焚掠振軍聲境未潛師入人皆到處驚風聞全隊出伏甲襲孤城
莽莽陣雲昏登陣勁卒屯城關金鑰啟車軸鐵籠奔擾攘來千輛安危繫一門令行需禁止諄切告司閭
震怒髮冲冠威行賊膽寒生靈關繫大情面破除難罪我功皆過宜民猛濟寬任勞兼任怨浮議聽譏彈
十三日肥鄉練勇敢賊於曲州之香城固

剿賊凌晨出黃昏尙未歸求援人力竭赴救馬蹄飛笳鼓連天震旌旗顛地揮望風奔潰處頃刻解重圍
竭力援都閩歡顏動制台綏交兵氣奮旂動陣雲開會食酬軍士烹羔厲將材感恩宜效死觀察更輕財
二十六日肥鄉練勇敢賊館陶之善樂營

狡寇沿河掠偏師扼險防風吹波起立礮震火飛揚驍騎橫流渡凶渠墜馬亡還期軍橫掃果毅厲戎行
二十七日肥鄉練勇敢賊於善樂營

敗陣宵收隊衝鋒曉渡河流深應拒馬陣固願爲鵝背水兵鑿久開山礮震多戰酣天色晚返日欲揮戈
張棟擒賊紀事爲樹屏作

廣平多莠民有村曰張棟結黨惡習沿習教邪經誦常則稼穡安變則刀兵弄更有舒兒莊行爲相伯仲
焚掠禍屢興逋逃藪與共村人過此間邯鄲同黨送團練械繫之相與公堂控研究竭虛衷始知反者衆
吐實姓名留寬恩俘囚縱此事秘不言軍務理錯綜兵退赴廣平彼地官疑恐出言多阻撓旋師務持重

密稟觀察知過行勅賜從師會蹤甚潛渠擒謀屢中乘夜抵其村賊尚在醉夢拒捕斂凶鋒問名逞健訟
按單細推求指實互喧鬩一十有七人伏罪咸駭恫計秘首逆擒法嚴重典用更有舒兒庄請君同入甕
除姦後患彌獲醜豐功頌越境掃妖氣 天書將錫鳳

二月戰守紀實

爲有巡河舉行旌抵小灘 崇制 遠迎方整隊弛備竟偷安狡寇乘虛入洪流扼險難黃金堤望處烽火
黯漫漫

竟日風霾暗有皇逼寇氛南門關洞啓東鄙屋皆焚避難踉蹌至馳援約略聞 余隆軒 衝鋒烟霧裏敵騎
敗紛紛

兵敗東章堡移營駐北高裹糧炊未熟衷甲棄先逃潛遁宵博令窮追夜帶刀鋒車馳赴處寒色冷旌旄
竟夜狂奔去傳聞入曲周前鋒剛敗挫一旅敢淹留轍以還轅息師從返旆收整軍期復戰慷慨誓同仇
又復從征去移營塔子橋旌旗縈柳色父老餞花朝敵愾刀磨利摧鋒騎擁驍勤勞應不憚一路馬蕭蕭
鷄澤師徒敗潛分兩路兵全軍方北犯一旅忽南行大將窮追去妖氛孰與平永年西鄙警關已入臨洛
聞說邯鄲陷凶鋒逼縣西車塵來擾擾烽火望淒迷警報驚風鶴軍聲振鼓擊戒嚴申將令城守衆心齊
遠自成安返西南又被兵難民方絡繹游騎忽縱橫山倒羣情震風聞衆論驚開門持定議鎮靜息紛爭

肥鄉縣志

卷四十一 藝文詩

三十七

張達剛焚掠城南堡又侵開槍民力奮射馬逆渠擒出隊塵皆暗旋師日已沈聲威遙震處聊以固人心
夜雨溟濛灑登城極目望雲容垂地暗火氣接天長撫慰軍心奮飛騰士氣揚南樓同坐處籌畫務精詳
帶隊門同啟逃人數愈多疏通方設法衝突忽揮戈游騎南關逼全師北路過人情愴懼甚退敵策如何
關外鄉民集濠邊勁旅屯背城堅結陣出隊洞開門礮火穢羣醜烽烟暗遠村解圍遙遁處塵埃書昏昏
出境肩方息妖魔敗復還陣排嚴背水 余太尊啟 令下整如山兵潰奔馳處烽明遠近聞可憐東北境攻
伐四圍環 賊塔子橋

寇又西南撲旋師勒馬臺風馳書屢報路遠礮難開戈戟森嚴過旌旗絡繹來前鋒遙指處山已逼天台
勁敵嗟深入新兵喜又增分餐傳隊隊教陣布層層鎮定軍心肅飛揚礮火騰聞聲游騎返出沒又何能
逼近兵鋒處危城冒雨巡西方烽屢報東路火猶新四面烟塵濕三更警戒頻關心門下士 喬日 深夜共
艱辛

西路師猶駐東城馬忽來乘圍知寇逼整隊飭門開誓衆嚴師律當衢守礮臺揚聲鎗發火敵騎已奔回
馬步相偕全城隅繞路遙倉黃逃衆過紅白大旗飄迢遞村墟隔飛揚士卒驕礮開難得力強敵莫輕招
列陣沙灘上前鋒敢撲城士心知奮激礮火震甸甸馬倒人皆斃渠殲衆盡驚援兵追又至夜遁忽焚營
寇退門方閉漫天雨又風城頭雲盡黑關外火猶紅霧散星皆見烽傳焰若烘北門危坐處調度竭私衷

徹夜嚴巡警凌晨得捷音總戎知戰勝

姜鏡台

都護喜渠擒

恒都統

力掃妖魔氣歡騰壯士心更聞賢太守

余蔭軒 赴救馬駸駸

西路摧強寇暫駐時郊迎宏接納館適話交期敍戰優褒獎留官力主持

樹屏調署永年紳民具稟保留已恩準傳詳

西南

烽火近整旅簇旌旗
轉戰逾千里旋師得暫歸衝鋒軍可掃破敵將皆飛

十九日楊竹坡以五百人先登大敗賊於甯晉

振旅功知懋馳援令敢違五更

三月防守紀實

新舊正乘除旋聞告急書士民皆震恐人地况生疎共問匡時策紛馳避難車代庖難越俎扼腕意何如
仙令喜瞻韓虛懷問治安政寬宜濟益事急敢辭難調度頒新令扶持仗舊官前籌方借筋塵堪已迷漫
戈戟簇前鋒旌旗絡繹從繞城知勢逼據險遏兵衝處處嚴排隊村村近舉烽二更猶未返鎮靜氣從容
笳角響傳聞匆匆夜整軍令嚴昭日月志奮激風雲炤息消秦火渠壘靖楚氛行營將赴調猶自建奇勳
大隊勇剛裁倉皇警報來銷兵難悔禦避難尙門開敵騎行還止逃人去復回可憐村墅裏焚掠有誰哀
棒檄赴行營從新又募兵隊仍分五陣警忽報三更祖道朝行酒披衣夜守城逃人詳細問北路騎縱橫

肥鄉縣志

卷四十一 藝文 詩

三十八

犯曉過全師兵來又一支塵中飛鐵騎樹裏捲珠旗拭目遙看處登陣固守時四城巡察遍筋力已皆疲
黯淡布濃陰城頭密雨淋洗兵消沍氣入夜沛甘霖望澤農夫意乘闔壯士心疎防非細事勞敢憚宵深
旋里欲耕田驚聞警報傳制軍方奏捷

劉蔭渠制軍賊於永年之柳營分為二股一股北入沙河一股南入肥鄉

狡寇又侵邊西鄙風塵暗南城步

騎連敗軍誰夾擊蒿日盡烽烟
逐北至沙河

劉蔭渠制軍賊於沙河縣

鴉軍共奮戈考應書上上兵益辦多多節度高千里將軍馬伏波肅清知不日

奏凱聽鏡歌

弔遇害生員王崇儒

功成曾記請纓時

去年十一月二十九日隨官勇敗賊於西賢店

視死如歸又若斯避禍難同鷄斷尾剝膚慘等豹留皮

為賊剝皮而死

傳絳帳文章老

生曾受業於門

血化青憐節義奇戰績昭然猶未敍捐軀為國復誰知

李烈女歌

忠烈之氣參天地全節完名死無貳丈夫慷慨固捐軀女子從容能就義烈女毓質縣西鄉婉孌閨中猶
待字釵荆裙布樂安貧夏靖冬溫能養志溫柔敦厚兒女情磊落光明英雄事去年流寇起山東豕突狼
奔兵氛熾烽烟逼近無奈何易服改妝禍亂避老母幼弟結伴行踰躑逃至石柱寺道旁古井寂無人一
騎紅塵邊馬至忽見嬋娟眼欲燒携之同上青絲騎以死自誓怒填胸氣奮風雲申申豈馬鞭毒打逞凶

威體無完膚志不易繫縲母弟磨利需如不相從生難冀堅貞固欲大節全躊躇不肯慈親棄轉怒爲喜
誘甘言以異行權施譎智老母幼弟放其行相隨始可從容議轉身向母哭失聲與弟速行莫疑忌自拚
一死抗凶鋒歸家莫以兒爲意返身罵賊厲貞修投井捐生敦古誼事當難處能兩全節固無慚孝亦備
我聞此事發長嘆忠烈不以裙釵異自從東省警風塵戰守機宜密處置陣敵團練寇屢殲志奮膠庠身
可致讀聖賢書禮亦宜陣亡非等輕嘗試貞媛乃復見闔門巔末從頭詳爲記表揚節孝報 文星潛德
幽光不終闕珠玉揮毫門待旌金石鐫銘墓誰誌何時 綸綉煥 龍章 天語褒揚至再四 詔書重
疊烈女旌 卹典優隆烈士賜廉頑立懦風化關後人爭欲徽音嗣

葛蘗故城

故迹難尋葛蘗城武靈於此亟經營登陴固守英雄事鼓瑟清歌兒女情綠酒紅燈春夢醒頽垣敗礎舊
基傾沙邱探轂豪華歇剩有夫人獨擅名

列入故城

建議城將此地遷明有此議不果行誰知故迹已茫然名臣闕闕開元魏宋隱等皆列人人一代山河創後燕慕容農於人起兵封域周
環猶昔日垣墉傾圮始何年登臨我欲詢沿革風影難憑父老傳

八月防守紀實

肥鄉縣志

卷四十一

藝文 詩

三十九

拭目靖干戈無如寇警何方聞踰衛水十七日恒提督蘇都統敗賊於開州賊踰衛河北逸倏報渡漳河口十八兵氣成安逼軍書薄暮過繕

完商入保鋒已抵荆科

事急敢偷安巡防告縣官乘闕宵月朗授甲夜燈寒勇士招徠粹人心撫慰難二更聞警報烽火接西韓

唐家曠安營鄉民到處驚傳餐宵尊食奪馬夜添兵震盪遙聞礮倉皇夜赴城登陴傾耳聽不斷走車聲

郭外衆雲屯逃人絡繹奔十九殷殷詢賊勢欵欵慰驚魂稽察嚴傳令哀矜洞啟門日中聞探報營已起

前村北入永年境

太守領雄師余蔭軒天雄警報知自大名聞警渡河揮鐵騎赴救擁珠旗後隊戈矛簇前驅羽檄馳整軍連夜起

追剿敢稽遲

駕返喜傳聞東郊候使君楊樞屏離群經五月救患整三軍渺渺懷難述匆匆手又分過門真不入夜駐營常兒棄

惆悵望行雲

二十九日夜半城角大炮放光詩以誌異

炮臺逼兵衝屹然城之畔上置佛郎機中含流星彈狡寇攻城時一發胸膈貫如何深夜間霞光騰蔚煥
練勇爲我言神靈默相贊前年胡盧營王大中反叛四月二十三夜當夜半矛頭火氣騰劍脊星光爛
執戟焰飛揚揮戈色璀璨驟觀人皆驚傳觀衆相喚城守備非常連宵直達旦次日救兵來勇可三軍冠

王大中伏誅胡虜營解散始知狡寇謀乘夜思擾亂衝枚潛師來觀釁危城看忽見燈火然旋師同鼠竄
刀劍放光明神祇實衛扞物換星條移事異理同斷或者仗神靈從此解危難延訪辭皆同有徵言非譚
但願輿論符烽烟靖里閭優武修文事光芒徹雲漢

九月城守紀實

城外車馳過譁言盜賊來計程知縣近何故尙門開聞警親爲訪傳訛衆尙猜登樓遙望處南路盡塵埃
初五日

已過漳河店旋衝百子營成安人盡擾邊鄙衆皆警招募新添勇防維靜守城天台山下路敵騎已縱橫

敗陣鋒雖挫恒提督蘇都統連敗之於觀城開州滑縣收軍勢尙強潛師趨潞縣薰水越衡漳前路旌旗引前打中軍傘蓋張紅傘

揚聲紅過此火器莫開槍賊過天台山寨揚聲曰官兵過此甚勿開槍

故道漳河涸逃車狹路逢殺人聲慘切奪馬勢豪凶寨上遙開礮沙中遠避鋒救援非恃此何以遏兵衝

鐵騎聞遭擁中央步隊多虜人施譎計乘勢抵荆科旆旆塵中捲辛安鎮外過生民塗炭甚蒿目意如何

馬至龍堂堡違城路不遙火然光遠近城守衆蕭條鎮靜人心固飛騰敵騎驍鄉團能用命士氣奮深宵

團練民皆集危城夜共巡登陴借勇將楊竹禦侮約同人燈火聲威赫雷霆號令新忽聞鷄遠唱天色倏

凌晨與劉光陸及張廷昭張夢星徹夜巡警

肥鄉縣志

卷四十一 藝文 詩

四十

犯曉門徐啟傳言衆共聞起行奔敵騎逐北見官軍車馬馳如水旌旗擁若雲相違無數里拭目奏奇勳
恒提督蘇都統帶馬隊數千追至距城不遠

九月防守紀實

牽馬匆匆至傳言寇已深賈莊方縱掠辛寨已交侵駿馬沿村奪逃人入境擒更看東北路車騎驟駸駸

寇逼東章堡村民猝不防兵方三路集網已四圍張鞭撻搜騾馬喧呼索酒漿可憐逃難者何處可潛藏

軍有英雄號大名道移師駐廣平衝枚宵整隊舉火夜焚營摩壘貔貅擁拋戈鳥獸驚崑岡炎玉石誰與

念民生

小地來逃匪隣封路不遙誓師威赫赫整旅馬蕭蕭後勁新軍繼前驅奮勇招風馳擁雲處兵氣奮崇朝
十三日

狡寇聞風遁妖魔漏網難兜擒逢狹路捆送節鄰團重賞人皆奮併誅法詎寬聲威遐爾播聊以衆情安

懇求樹屏優免陣亡遇害生監子孫徭役並免充里里書地方樹屏恩準出示存案永遠遵行詩以

紀事

煩重蠲徭役哀矜到子孫生前曾殉難死後復蒙恩慷慨持清議殷勤表義門居功吾豈敢聊以慰英魂

陣亡游擊史鵠殉難守備常奇珍入祀忠義祠

剿賊赴連州 史鶴劄釋 邊雲黯淡愁裏屍拚馬革登甲遜龍頭 甲戌科 武榜眼 科第難兄繼 兄 戊戌 進士官游擊 旂常偉績

留蠻荒腸斷處芒角大星流

開建守孤城 常奇珍守開建 縣城陷殉難 炎荒正苦兵衝鋒酣戰氣固壘振軍聲援絕臨危陷門開誓死爭捐軀能爲

國不負美科名 乙巳武進士

廟食禮優隆 朝廷爲勸忠 史鶴奉旨入祠 豈知成闕典何以勵臣衷時過 恩重沐名齊祀並崇闡幽褒節烈

此意兩人同

十二月十五日會同樹屏竹坡及副齋趙淳然送陣亡哨官練勇入祀昭忠祠連日祥雲沃沛詩以

紀事

節烈褒揚切天人感應通英魂來彷彿瑞雪普溟濛遺孽灰然燼高陵莽伏戎鴟張思蠹奪豕突敢城攻
禦侮資奇策掄材竭苦衷陳師明約束領隊選英雄顛地旗懸白轟天礮震紅五花方演陣一戰竟成功
奉調遵嚴令邁行類轉蓬防河流過險獻馘騎乘驄紫掣沈沙戟形彎滿月弓賞邀嘉績日死效感恩中
身屢經勞瘁心無間始終威名宵晉北偉績館陶東狡寇謀真譎巖疆亂內訂請纓期射隼拔幟欲當熊
退舍戈揮日緝光劍吐虹方思搜穴蟻豈料化沙蟲慷慨當強敵艱難厲匪躬前茅鋒忽挫返顧路皆窮
陷銳精神健捐軀士卒同毅何慚致果典不愧昭忠凱撤饒歌返庸酬禮貌隆潔性明祭告諷吉啓祠宮

肥鄉縣志

卷四十一 藝文 詩

四十一

老淚縱橫灑高文點綴工尊卑咸略分小大憫從公惻怛榮私念精誠格太空濃陰寒釀雨朔霰舞隨風
層礪言霏玉宵連漏轉銅兵氣全滌蕩沴氣盡消融去歲清明屆鄉團饗祀崇養神醴綠酒沃澤沛蒼穹
轉眼芳時過傷心慘禍叢革拚誰裏馬爪印永留鴻事苟孚民願聞皆達
帝聰祥雲飄漾處從此卜年豐

出郭初見遠山感賦

知縣韓 印

幾日狼烽息馳車眼乍醒雙流漳水涸一髮太行青遭亂民疑少催科吏未停自慚稱父母奚以繼前型

楊樹翁先我合縣邑愛民 籌國殫竭心力書上上考

各村遇害紳民六百四十餘人入祀昭忠祠

趙文濂

忽殞兵烽亦可哀後先相繼赴泉臺死期殺賊精誠竭祠爲昭忠棟宇開典禮優隆緣義起英魂陟降恍
神來天心一樣容愁慘朔雪隨風陣陣催

烈女李省姐並烈婦二十餘人入祀節孝祠

事因急智得流芳特請文星爲表彰 捐生全節緣由申請學憲特 賜給智流芳匾額表其門閭 綸錫門將施綽褱 學憲咨部奏請旌表樹屏 亦非諸烈婦申請 賜卹 祀
崇享預合祠堂窺銷古井波瀾息 烈女罵賊 投井死 名附貞魂姓字香怪得風寒兼雪冷堅剛節共凜冰霜

陣亡哨官練勇團長團丁殉難紳民婦女刊石鐫碑分立昭忠祠節孝祠

殺運苦未除風塵屢告警游騎近逼城潛師敢掠境練卒飭鄉團各自衛鄉井挽強弓矢張鬪捷干戈逞
凌厲氣飛揚精嚴陣修整捷獻雖擒渠師燿亦列頸馬步勢相懸騎難敵馳騁酣戰賊勢張延燒火力猛
堅守城屢危赴援道又梗嗟爾衆紳民沒難保首領核實名恐遺飛章郵爲請忠節表閭閻絲綸錫臺省
入祠祀並崇鑄碑垂使永大力山可移特書筆代秉修月斧揮吳成風斤運郢痕拖水墨紋字煥龍蛇影
貞珉峙峨峨忠心表耿耿頻年禍亂叢豕蛇肆兼併吠畝氣敦龐膠庠才俊穎竭力保鄉閭無辜罹災眚
溫柔婦得佳幽間女稱靜罵賊軀可捐全貞節同靖湮沒苟無聞五內憂恟恟厲節 恩屢施成仁名非
倖穹碑摩崖書懦頑宜益省奔亡活草間千秋尙齒冷

從軍行

殺運將開烟塵起團練鄉民保闔里結陣縱橫演五花轉戰迴旋逾千里旌旆飛揚戰鼓鳴短衣匹馬賦
長征重圍立解香城固天險嚴防善樂營大將防河兵勢挫如此洪流等閒過故鄉烽火照天紅躊躇惟
恐危城破提兵回救路迢遙逐北營移塔子橋鐵砦金碣鋒陷銳烏亭驚駭騎連驪宵晉追奔師已老力
挫凶鋒中堅搗制軍含笑催賜金健兒軍可千人埽敍戰銘功指日看忽聞警報陷邯鄲整軍氣以還鄉
奮重爾人忘行路難衆雖一旅軍符調城內空虛兵難召雷奔屯掣從西來淨掃妖氛大古廟載戢干戈
欲賦閒吏隨仙令在行開北河寨外收降處積甲高齊熊耳山一戰功成不負汝置腹推心取懷予捷書

肥鄉縣志

卷四十一 藝文 詩

四十二

方欲奏 朝廷垂成又被兵氛阻河東忽地起狼烽遺患無窮爲養癰令下三軍繚甲冑師興六月簇兵
鋒禾稼連雲天大雨師徒撓敗勇難賈潰圍得出倖全生竭力馳援能救主疲兵再戰壯兵威旗鼓堂堂
大合圍四面楚歌軍盡墨千層漢幟將皆飛釜底游魂跳身走焚巢大破逋逃數摩崖功績勒燕然定取
黃金印如斗如此勲勞薦牘遺依然故我意淒其傷心奏凱言還日扼腕揮戈酣戰時名器 朝廷宜慎
重樛才敢說爲時用無如擁兵自衛人皆進崇階增厚俸英雄籠絡盡虛文烏盡弓藏自古聞生不封侯
空百戰數奇慟哭李將軍

寫藥城一名夫人城

昔趙武靈王爲夫人築城危樓凌傑閣畫棟連雕甍鳳臺峙巖巖雉堞環崢嶸垣墉踞勝勢瑟琴和新聲
從房列趙女素手彈秦箏欲老溫柔鄉誰知禍患嬰少子位雖傳長子兵紛爭肥義殉國難李兌啟亂萌
探巖沙邱宮哲婦城眞傾迄今數千年歲月悠悠更頽垣斷礎沒蔓草荒烟平遺踪何處覓考古心怦怦
偶詣天台山奇鵬遇薛生適館舊特訪倒屣歡相迎談文把酒蓋論古剪燈繁細詢城何方考核頗能精
有村劉家寨距此八里程村東城久無寫藥存其名故宮盡禾黍廢墟荒榛荆每當春夏交陰雨倏然啼
虛無縹緲間樓櫓浮雲橫重闔日華炫曉市烟光縈綠青露屋瓦流丹認蒼楹海中簪蜃樓一水隔盈盈
眞形約略觀變態須臾呈二三年不定光景現晶瑩聞言詫奇事懷鄉動遠情我村名郭下川原美且清

陰晴隨時變城郭頃刻成野氣幻樓臺於此相發明考古有特識定情憶舊盟邯鄲趙王城庶幾相抗衡
徵禮賴文獻核實共品評詭言埋承相何足爲重輕俗云夫人城裏埋承相則葛藟城誤指縣城矣

重挑城濠詩以紀實

樹屏履任時城工始發輒崇墉屹屹修外濠深深濬丈尺會計均遠近程期信諸村宣力同六日成功迅
據險扼重堤背水盤大陣烽火屢屢經聲威赫赫震狡寇雖鳴張用師難觀釁迄今五載餘淤墊驚轉瞬
風雨肆漂搖牛羊恣蹂躪巨壑乏幽深高岸失險峻風塵偶然驚邊隅何以鎮錫侯甫下車英英才露俊
進秩冰勵銜繫肘金縮印時和兵氣銷政通民心順思患先事防徵役擊鼓振鑿險下可因通幽井如浚
功期不日成事自從頭認諄諄誨爾民木鐸適人徇樹屏鑿池功庶不虧九仞惟願後之人敬終始同慎
補葺逐歲修邁征與時進作詩題濠梁聊當歌以訊

陣亡王運南字向離

邑人鄭邦彥

離火駭聞沒漢江弔君南悵感飛旌將星落地光全部彈雨欺人上戰艘瀟口忠魂誰與偶清漳傑士此
無雙先生身死心難死大別山前氣未降

陣亡王家幹

泣溯捐軀慷慨姿墨磨和淚強吟詩桐聲窻外添多恨槐蔭堂前拆一枝材大何郎偏勝舅與余分屬姻甥幹成

肥鄉縣志

卷四十一 藝文 詩

四十三

伯道豈無兒三生子壯魂毅魄知還在靖掃萑苻定有時

澄清漳城有感

我步清漳城於唐爲古縣到今日肥鄉陵谷已屢變我今作勝遊惆悵何所見其南面浮坵天台峙西面
東望半漳隄北流環殆徧襟帶亦名區山河生彩綉人傑緣地靈姓名先史傳肥義死報君肥鄉之名本此作輔
故主戀程嬰匪趙孤世傳在縣南五里程難堡村忠肝經百練相士說平原襄在縣南屯莊村北里許毛生曾自薦趙多慷慨人義氣
令我羨在宋李太初端凝蒙帝眷在元竇子聲誠正膺銓選太初先生名沆爲縣西和公莊人子聲先生名默爲縣東城西村人迄明富科名輕
肥多不賤查史志可知武烈與文謨人材互隱見蹉跎直到今海瀾變清晏同室况操戈處堂多雀燕城在人
已非策誰籌後善我愧作迂儒詩吟鄙且諺

丁巳水害

滿地汪洋難若何問年無麥更無禾酬豐演劇優伶少告歉沿門乞丐多憤世雷霆都挾怒不時風雨亦
違和生民幸福今安在盡付東流作巨波

戊午春初憫荒

去年洪水爲滔天誰道今年勝去年不信城頭高處望春來村落半無煙

庚申再荒并序

庚申經年不雨歲乃大飢起視肥境斷炊煙者至萬井後賴國際統一會之賑濟民之得活者甚夥因作此誌謝以示不忘云

嗟嗟黎庶苦顛連海國恩波作惠鮮會際風雲成統一膏沾雨露竟無邊鴻嗷得免郊誰適蟻命能全壑豈填我亦清漳沾被者爲酬高厚寫吟箋

余公河溢

在高庄村西
丁巳

諸艱歷試困生民天意茫茫辦未真旱魃爲災纔去也余公河又值波臣
旱乾水溢古同今烈士顛危感慨深是否災殃由自作敢將休咎問天心
年光無麥又無秋怪煞馮夷強出頭世進文明沾幸福不圖洪水向今流
災罹禾稼及廬居禱雨祈年作子虛到此魚豐占不得怕將姓氏共維魚

憤詩

彈雨槍林沒了期同胞塗炭有誰知全身膏竭嗟黎庶滿道尸橫盡健兒南北地盤紛割據短長權柄互
爭持迂儒不解爲時務強把狂吟頌義師軍行到處作歡迎旗漾紅標血染成嚇破國魂爭獻媚駭逢鬼
面且吞聲師興每自無端生民畏全由強迫成寄語痴蒙休便怪此關時運不關兵

肥邑庚申亢旱通年歲苦大飢死亡枕藉豈第曰民多菜色哉後蒙

肥鄉縣志

卷四十一 藝文 詩

四十四

國際統一貴會賑濟肥民之瀕死得活者殆不可以更僕數乃圖報未從鑿井防旱復被儲恩殊
未知結草啣環之竟在何時也因復勉成七律數韵自寫愚悃用抒感戴並爲清漳之占井養者
同獻血誠於一占云爾

環海邦交普惠鮮代民鑿井勉耕田四郊旱魃防爲虐九仞工夫喜及泉幸免鴻嗷思客歲得逢鮒射又
今年頻沾高厚慙難報句詠聊酬及地天

民國十五年陰九月二十二日雪

暮秋天氣雪飛揚白帝權分孰主張一樣催租詩興敗滿城風雪近重陽

民國十五年陰曆臘月初二日大雨

風雨滿城臘月初冬行夏令竟何如倘教載入麟經筆也與無冰一樣書

其二

二九光陰玉雪逢淋漓雨注作汪洋冬行夏令緣何事是否蒼天亦改良

